


# বসন্তকুমারের পত্র।

উপন্যাস।



শ্রীনটেন্দ্রনাথ ঠাকুর

প্রণীত।

কলিকাতা

৭৫ নং কর্ণওয়ালিস্ ট্রীট, বাঙ্গালা বস্ত্রে

শ্রীহরিচরণ আচার্য্য দ্বারা মুদ্রিত।

( All rights reserved. )

১৮৮২।



# বসন্তকুমারের পত্র ।

( উপন্যাস । )

হরকুমার চট্টোপাধ্যায়ের প্রতি বসন্তকুমার  
মুখোপাধ্যায়ের পত্র ।

সোদর-প্রতিম হরকুমার !

অদ্য পূর্ণিমা। আকাশে পূর্ণশশী মধুভাসি ভাসিতেছে।  
নীলাকাশস্থ চন্দ্রমণ্ডল হইতে শাস্ত রশ্মি আকাশতল  
শাস্ত করিতে করিতে নিম্নে আসিয়া নদীবক্ষে, পদ্মতে,  
পথে, ঘাটে, মাঠে, পুষ্করিণীর জলে রজত-ছটায় প্রতি-  
ফলিত হইয়াছে। চারিদিকে কেবল আনন্দ—বালক,  
বালিকা, যুবক, যুবতী সকলেই বিমল চন্দ্রকিরণস্নাত হইয়া  
আমোদ করিতেছে। রাত্রি জ্যোৎস্নাময়ী—কিন্তু যাত্রা-  
দের সুখ ফুরাইয়াছে, বা সুখের আশা চিরদিনের মত  
অস্তহিত হইয়াছে, তাহাদের হৃদয় এই জ্যোৎস্নাময়ী

রজনীতেও ঘনাস্কতমোদয় । তুমি জান, আমি জ্যোৎস্না-  
 ময়ী রজনীর পক্ষপাতী—টাঁদের আলো আমি বড় ভাল  
 বাসি ; কিন্তু চন্দ্রালোকে এ হৃদয় আর উজ্জ্বল হইবে  
 না । বুঝি, কিছুতেই আর এ হৃদয় উজ্জ্বল হইবে না ।  
 আমার এই বিংশতিবর্ষ বয়স হইল, এই বয়সেই  
 বুঝি আমার সকল ফুরায় !—ফুরায় কেন ? ফুরাই-  
 যাচ্ছে । আমার জীবনের এই সুখ-স্বপ্ন—এই মধুর  
 খেলা কিসে ফুরাইল শুনিবে ? হরকুমার ! এ সংসারে  
 যদি কেহ আমার সুহৃৎ থাকে, তবে সে তুমি । তোমাকে  
 এ সকল হৃদয়ের কথা না বলিলে আর কাহাকে বলিব !  
 সুরোদ্যানের পারিজাত, হীরককুলের কহিনুর, রাজ-  
 কুলের রামচন্দ্র, বন্ধুকুলের তুমি । তোমাকে ভিন্ন এ হৃদয়-  
 দাহক শোকপাবক আর কাহাকে দেখাই ? স্মৃতি ক্ষেত্রের  
 বহুদূর পর্যটন করিয়া দেখ, আমাদের প্রতিবাসীকন্যা  
 কুম্মিকাকে মনে পড়ে কি ? না, আমাদের গ্রাম ত্যাগ  
 করিয়াছ বলিয়া সকলই ভুলিয়াছ ? যদি মনে না পড়িয়া  
 থাকে ত বলি যে কুম্মিকা, মৃত বিশ্বনাথ বন্দ্যোপাধ্যায়ের  
 কন্যা । তুমি তাহাকে নিতান্ত বালিকা দেখিয়াছ ; এক্ষণে  
 সে বড় হইয়াছে, লিখিত পড়িতেও শিখিয়াছে । আমি  
 তাঁহাকে লেখা পড়া শখাইয়াছি । আমার দুইটি ছাত্রী—

কুম্মিকা ও আমাদের প্রতিবাসী বিনোদবিহারী চট্টো-  
 পাধ্যায়ের কন্যা নীলাঞ্জিকা। ইহাদের দুই জনকেই  
 তুমি দেখিয়াছ,—কিন্তু তাহার পর বহুদিবস গিয়াছে।  
 কুম্মিকা এক্ষণে আর বালিকা নহে, সে এক্ষণে কিশোর-  
 বয়স্কা। কুম্মিকা সুন্দরী,—তাহার সৌন্দর্য্য অতি পবিত্র  
 ও সরলভাময়। সে সৌন্দর্য্য অনুভব করা যায়, কিন্তু  
 বুঝান যায় না। কুম্মম আমাকে ভালানামি ভালবাসে।  
 ক্রমে সেই ভালবাসা বয়সের সচিত বন্ধ পাঁতে লাগিল।  
 হৃদয় সেই ভালবাসায় পূর্ণ হইতে লাগিল, জগৎ  
 মধুর দেখিতে লাগিলাম। কুম্মিকা একাদশ উত্তীর্ণ  
 হইয়া দ্বাদশে পড়িল। তখন কুম্মিকা আর অধিক  
 আমার নিকট আসিত না, আমাকে দেখিলেই মধুরহাসি  
 হাসিয়া পলাইত। কখন কখন আমার অনুপস্থিতে আমার  
 পুস্তকে কালির দাগ কাটিত। কখন কখন দুই এক খানি  
 পুস্তক লুকাইয়া রাখিত। কখন বা পুস্তকে আমার কতক-  
 গুলা নাম লিখিত। আজি এক বৎসর হইল কুম্মিকা  
 আমার নিকট পড়া বন্ধ করিয়াছে—তাহার মাতার  
 আজ্ঞায়। এক্ষণে কুম্মিকার বয়স তের বৎসর। আজি  
 কালি সে প্রায়ই আমার নিকট আসে না। আমাকে  
 দেখিলে কখন কখন দূর হইতে আঁধ লক্ষ্যে, আঁধ

আহ্লাদে ধীর অথচ তীক্ষ্ণ কটাক্ষের নিক্ষেপ করে । এক্ষণে সেই আয়ত, প্রশান্ত লোচনে কটাক্ষ দেখা দিয়াছে ; সে কটাক্ষ তীব্র নয়, মর্মভেদী নয়, কোমল, ধীর অথচ স্মৃতিক্ষ । কুম্মিকার এক্ষণকার এই সলঙ্কভাবটি অতি মধুর । যৌবন মঞ্চারের সঙ্গে সঙ্গে যে একটু লঙ্কার আবির্ভাব সেটী অতি মনোহর, অতি পবিত্র । শীত ও গ্রীষ্মের মধ্যবর্তী বসন্তই রমণীয়, যৌবন নিদাশে একমই অগ্নিগয় করিয়া তুলে । হরকুমার ! এই বাসন্তলাবণ্যময়ী কুম্মিকা আমার জীবনের আনন্দ, পৃথিবীর স্বর্গ, ভবিষ্যতের আশা । আমার সেই জীবনের আনন্দ, পৃথিবীর স্বর্গ, ভবিষ্যতের আশা আমার হৃদয় হইতে কাড়িয়া লইতেছে । কুম্মিকার মাতা এক সমষ্ক স্থির করিয়া তাহার বিবাহ দিতে উদ্যত হইয়াছেন । বিবাহ শীঘ্রই হইবে । আমার সেই বাসন্তিনী, জীবনের আনন্দদায়িনী, লাবণ্যময়ী কুম্মিকা পরের হইবে, ইহার চিন্তামাত্রই আমার হৃদয়ে শত-বৃশ্চিক-দংশন-জ্বালা অনুভূত হয় । হরকুমার ! আমার আর পৃথিবীর সুখ ভাল লাগে না । তোমার জীবন সুখপূর্ণ, তুমি সুখ ভোগ কর । পৃথিবী আমার চক্ষুঃশূল হইয়াছে, প্রাণের ভিতর সর্বদাই কে যেন কাঁদে । কি ভাবি, কিছুই স্থির করিতে পারি না ।

## উপন্যাস ।

তুমি, আগার এই দৌর্যল্য দেখিয়া হাসিবে । কিন্তু  
দ্বিজ্ঞাসা করি, ইহা কি কেবলই দৌর্যল্য, ইহার ভিতর  
কি আর কিছুই নাই? যাহা হউক, এক্ষণে যে কি  
কষ্টে দিন কাটিতেছে তাহা তোমাকে আর কি লিখিব ।  
সন্ধ্যা অবধি সকাল পর্য্যন্ত মৃত্যু কামনা করি, আবার  
সকাল অবধি সন্ধ্যা পর্য্যন্ত তাহাকে দেখিবার জন্য  
অধীর হই—গ্রহ কদাচিত্ প্রসন্ন হয়—অনেক দিন  
হইল, কুমুম একটি ফুল দিয়াছিল, সেটি শুকাইয়া  
গিয়াছে । তাই আর একটি চাহিয়াছিলাম, অনেক  
ইতস্ততঃ করিয়া একটি স্ফুটনোগুথ গোলাব দিয়াছে ।  
অদ্য তিন দিবস হইল তাহা আমার ফুলদানীতে রচি-  
য়াছে, পাপড়িগুলিন শুকাইয়া গিয়াছে, মুখটি মলিন  
হইয়াছে ; কিন্তু অন্তর তেমনি সুরভি, তেমনি রক্তিম,  
তেমনি কোমল ! তিন দিনের কুল এত জীবন্ত দেখি  
নাই ! আর অধিক কি লিখিব, তোমার কুশল সংবাদ  
দিও । ইতি ।

৭ই ভাদ্র ১২৭০ সাল ।  
দেবপুর ।

} তোমারই স্নেহাকাজী  
বসন্ত ।

## হরকুমার চট্টোপাধ্যায়ের উত্তর ।

অভিন্নহৃদয় বসন্ত !

তোমার পত্র পাইয়াছি । যে কীটে তোমার হৃদয়  
কুরিয়া খাইতেছে তাহাও জানিলাম । তুমি সংসারের  
প্রেমবহ্নিতে পুড়িয়া মরিবার উপক্রম করিতেছ—ইচ্ছা  
করিয়া পতনোন্মুখ পতঙ্গের ন্যায় জ্বলন্ত বহ্নিশিখায় গা  
ঢালিয়া দিবার আয়োজন করিতেছ । জ্বলন্ত বহ্নিশিখা  
শুনিয়া তুমি বিস্মিত হইবে, তুমি বলিবে আমার এ  
পবিত্র প্রেম, বহ্নিশিখা কিসে ? ভাই হে ! ঘটনাস্রোতে  
কি যে কি হয়, তাহা কে বলিতে পারে ? কুম্মিকার  
প্রতি তোমার প্রেম যদি নিঃস্বার্থ হইত, তাহা হইলে  
তোমার এই প্রেমকে আমি বহ্নিশিখা বলিতাম না,  
যেখানেই স্বার্থ সেই খানেই বহ্নি । তোমার প্রেম  
স্বার্থপূর্ণ—তুমি কুম্মিকাকে কেবল ভালবাসিয়াই সুখী  
নহ । তুমি সেই ভালবাসার প্রতিদানে কিছু আকাঙ্ক্ষা  
কর । কি আকাঙ্ক্ষা কর ? কেবল পবিত্র ভালবাসা ?  
তাহা ত তুমি পাইয়াছ । কুম্মিকা বালিকা বয়সেই  
তাচার কুম্ম-কোমল হৃদয় খানি তোমাকে দিয়াছে—  
তাহার হৃদয়ে যেটুকু ভালবাসা থাকিতে পারে,



সকলই তোমাকে দিয়াছে। এক্ষণে দেখা যাইতেছে, তুমি অধিক কিছু চাও, তোমার তৃষা না থাকিলে তুমি কাঁদিবে কেন? তৃষা ত্যাগ কর—আসক্তলিপ্সা ত্যাগ কর, হৃদয় শান্ত হইবে। তোমাকে আমি ভাল বাসিতে নিষেধ করিতেছি না—ভাল বাস পুড়িতে হইবে, ভাল বাসিও না ততোধিক পুড়িতে হইবে। কিন্তু তোমার ভালবাসা স্বার্থশূন্য হইলে বহুশিখা তোমার হৃদয়কে দক্ষ করিতে পারিবে না। তুমি কুম্মিকাকে কেবল ভাল বাসিয়াই সুখী হইতে চেষ্টা কর। তুমি আমার এই সকল কথা শুনিয়া বিরক্ত হইবে না জানিয়াই এই কতকগুলি লিখিলাম। তুমি ভাবুক, এ সকল কথা তোমার অজ্ঞাত নহে। তুমি কেন, এ সকল কথা কে না জানে? কিন্তু জানিয়া শুনিয়া লোকে দুঃখ পায় কেন? এই সকল জানিয়াও কয়জনে ইহার মত কার্য্য করিতে সমর্থ হয়? ইহাতে আমাদের দোষ দিই না, কারণ আমরা দুর্বল ও পতঙ্গস্বভাব। শুদ্ধ উপদেশে—কতক-গুলি যুক্তিসিদ্ধ কথায় যদি স্বভাবের গতি ফিরিত, তাহা হইলে সংসারে এত দুঃখ থাকিত না। যাহাহউক, কুম্মিকার মাতা কেন দুইটি নবীনজীবনকে কীটমুখে সমর্পণ করিতে স্থিরসঙ্কল্প হইয়াছেন, বুঝিতে পারিলাম

না। তোমাদের পরস্পর ভালবাসা, বোধ হয় তাঁহার  
 অবিদিত নাই। তবে তিনি এ পবিত্রপ্রেমে বাধা দেন  
 কেন? জানিনা সংসারের লোকে কে কিরূপ বুঝে!  
 যাহা চতুর্ক ভাই, সংসারে থাকিতে হইলে হৃদয়কে  
 পাষণ করিতে হইবে। এ সংসার-সমুদ্রে কত শত  
 ঘটনাতরঙ্গ আসিবে। এই জীর্ণহৃদয়ে অহরহ আঘাত  
 করিবে, তাহা কে বলিতে পারে! হৃদয় আঘাত-  
 সহিষ্ণু কর, সন্তাপকে হৃদয়ে স্থান দিওনা। আর  
 তুমি লিখিয়াছ, তোমার বাঁচিতে আকাঙ্ক্ষা নাই,  
 বাঁচিতে আকাঙ্ক্ষা নাই বলিয়া মরিব কেন? অতি ক্ষুদ্র  
 কীটানুকীটের জীবন হইতে সৃষ্টির চরমোৎকর্ষ মনুষ্য  
 জীবন পর্য্যন্ত কোন না কোন উদ্দেশ্যে সৃষ্ট। সেই  
 উদ্দেশ্যে কাহার এবং কি, তাহা আমরা জানি না। কে  
 কোন্ উদ্দেশ্যে সাধন জন্য সৃষ্ট, তাহা না জানিয়াও  
 তাহার জীবনে সে সেই উদ্দেশ্যে সমাধা করিয়া চলিয়া  
 যাইতেছে। আমরাও এখানে যাহা করিতে আসিয়াছি,  
 তাহাই করিয়া সময়ে চলিয়া যাইব। মৃত্যু কামনা  
 করিও না। তুমি লেখা পড়া শিখিয়াছ, চিত্ত সংযত  
 করিতে শিখ নাই। চিত্তসংযম মহা ধর্ম্ম। সেই  
 ধর্ম্মের বলে জগতের প্রত্যেক বিপ্লব বিপত্তি স্বতঃই

তোমার সুখের পথ হইতে অপসৃত হইবে । কুম্মিকার  
সহিত তোমার বিবাহ হয়, আমার ঐকান্তিক বাসনা ;  
যদি ঘটনাক্রমে না হয়, চিন্তা-সংঘমে তুমি সমর্থ হও,  
জগদীশ্বরের চরণে আমার এই ভিক্ষা ।

১৯ই ভাদ্র ১২৭০ সাল }  
বিল্বগ্রাম । }

তোমারই  
হরকুমার শর্মা

বসন্তকুমার মুখোপাধ্যায়ের প্রত্যুত্তর ।

হরকুমার !

জগদীশ্বরের চরণে তোমার ভিক্ষা পৌঁছিল না—  
আমার চিন্তা সংঘত হইল না । আজি সপ্তাহকাল হইল,  
কুম্মিকাকে দেখিতে প্রয়াস পাই নাই । ভাবিলাম,  
যদি আমার সহিত বিবাহ, তাহার মাতার অভিপ্রেত না  
হয়, তবে তাহাকে আর কেন রূথা দেখা দিয়া নিজের ও  
তাহার মন ব্যাকুলিত করি ! যাহাকে দেখিলে, চিরকাল  
দেখিবার বাসনা হয়, তাহাকে যদি চিরকালই দেখিতে

না পাইলাম, তবে কেন ক্রমিক দেখিয়া এ ছুরন্ত তুষার  
 রুদ্ধি করি ! ভাবিলাম, যদি ঈশ্বরের ইচ্ছাই অভিপ্রেত  
 হয় হৃদয়, আমি চিত্ত সংযত করিব । সপ্তাহকাল চিত্ত-  
 সংযম মহাত্র্যেত ব্রতী রহিলাম । কালি প্রদোষকালে,  
 প্রাসাদোপরি শূন্যমানে বসিয়া আছি । প্রদোষগগনে  
 সান্ধ্য তিমির আসিষ্টা পড়িল, সান্ধ্যগগনে এক একটা  
 করিয়া নক্ষত্র নীরবে ফুটিতে লাগিল, বাল্যকালে যেমন  
 ফটিত এখনও সেইরূপ ফুটিতে লাগিল ; দুই একটা নিশা-  
 চর পক্ষী মাথার উপর দিয়া উড়িয়া গেল । ধীরে ধীরে  
 বহুকালবিস্মৃত সুখস্বপ্নের ন্যায় বাল্যরত্নাস্ত আসিয়া  
 স্মৃতিপটে উদয় হইল । সেই সুখপূর্ণ সময়ে তাহাদের  
 সঙ্গে এই প্রাসাদোপরি একত্রে বেড়াইতাম, ক্রমে তাহা-  
 দিগের মূর্তি আসিয়া স্মৃতিপটে চিত্রিত হইতে লাগিল ।  
 কুম্মিকা ও নীলাঞ্জিকা আসিয়া তাহাদের বাল্যরূপ  
 সম্মুখে ধরিল । বাল্যকালের কত কথা মনে পড়িল—  
 তাহাদের উভয়ের অকৃত্রিম প্রণয়, কুম্মিকার আমার প্রতি  
 বাল্যসুরাগ, আরও ত কত কথা মনে পড়িল । স্মৃতি কুম্মি-  
 কার সেই বাল্য মূর্তিখানি আমার সম্মুখে আনিয়া ধরিল,  
 তাহার সেই দিব্য মূর্তির সঙ্গে সঙ্গে সহস্রকথা আসিয়া  
 হৃদয় ব্যাকুল করিল, চিত্ত তন্ময় হইয়া উঠিল ।

স্মৃতিপটাক্কিত ছবি দেখিব না বলিয়া চক্ষু মুদিলাম।  
 এ চক্ষু ত মুদিলাম, কিন্তু মনশ্চক্ষু যে মুদিত হয়  
 না। মন অস্থির হইল। আকাশ প্রতি চাহিলাম—  
 নীল, অনন্ত আকাশে অসংখ্য তারকা নিঃসৃত্তে ফুটিয়া  
 রহিয়াছে। নীলাকাশে রহচ্ছন্দ্রমণ্ডল প্রকাশ পাই-  
 য়াছে। চন্দ্রমণ্ডল প্রতি অনেকক্ষণ এক দৃষ্টে দেখিতে  
 লাগিলাম— চন্দ্রদেব, পূর্বস্মৃতির সহায় হইলেন—  
 কুম্মিকা সঞ্চকে কত কথা মনে পাড়িল, তাহাকে  
 দেখিবার জন্য প্রাণের ভিত্তর ঝটিকা বহিতে লাগিল।  
 প্রতিজ্ঞা করিলাম, আজি এই চন্দ্রালোকবিভাসিত  
 রজনীতে তাহাকে একবার দেখিব, আর দেখিতে  
 দেখিতে প্রাণ ভরিয়া কাঁদিব। তাহার মাতার চরণে  
 ধরিয়া আজি সকল কথা বুঝাইব, পরে কুম্মিকাকে  
 না পাই, দেশে দেশে বেড়াইয়া এ যন্ত্রণাময় জীবনের  
 অবসান করিব। ইচ্ছা ভাবিয়া বাটী হইতে বাহির  
 হইলাম—কুম্মিকার বাটীতে ঘাইয়া তাহার সচিত্ত  
 সাক্ষাৎ করিব বলিয়া বাহির হইলাম। আমার  
 চিত্তসংঘম মহাত্রুত ভঙ্গ হইল। তাই হরকুমার! তুমি  
 আমাকে ঘৃণা করিবে, দুর্বলহৃদয় বলিবে, কি করিব!  
 জগদীশ্বর সকল হৃদয়ে সমান বল দেন নাই। কুম্ম-

মিকাকে দেখিবার জন্য তাহার ভগ্নপ্রাসাদ-সমীপে উপস্থিত হইলাম । তাহার বাটীর নিকটে ঘাইবামাত্র প্রাণের ভিতর বিষাদ-সঙ্গীত গীত হইল । কুম্মিকার বাটী পুরাতন, জীর্ণ ও ভগ্ন কিন্তু বহুদূরবিস্তৃত ও রহৎ । এই বহুদূরবিস্তৃত, রহৎ ভগ্নাটালিকার মধ্যে এক্ষণে কেবল তিনজনমাত্র মানুষ বাস করিতেছে । কুম্মিকা, তাহার গীতা ও এক জন রক্ষ পুরাতন ভৃত্য । কুম্মের পিতা একজন সমৃদ্ধ লোক ছিলেন । এককালে এই জনহীন ভগ্নাটালিকা বহুলোকপূর্ণ সুন্দর রাজভবনের ন্যায় ছিল । কোন অর্থপিশাচ বিশ্বাসঘাতকের চাতুরীতে ইহার। আজ পথের ভিখারী, —এইরূপ জনশ্রুতি । যাহা হউক, সেই জ্যোৎস্নাময়ী রজনীতে কুম্মকে দেখিবার জন্য তাহার প্রাসাদ সমীপে উপস্থিত হইলাম । ভগ্নাটালিকা চন্দ্রকর-বিদ্যোত হইয়া মলিন হাসি হাসিতেছে, মৃদুল সমীরণে রক্ষপত্র সকল মর্ম্মর শব্দ করিতেছে, প্রাসাদের, ভগ্ন ভিত্তির উপর একটা নবীন বনলতা নব কিশলয় বক্ষে ধরিয়া সমীরণে ঈষন্মাত্র ছুলিতেছে—প্রকৃতি নীরব, আমার হৃদয়ও নীরব, নীরব হৃদয়ে নীরব প্রকৃতি বড়ই মধুর লাগিল । প্রাসাদমধ্যে নিঃশব্দপদসঞ্চারে

প্রবেশ করিলাম। প্রাঙ্গণে উপস্থিত হইবামাত্র, প্রাসাদ-প্রাচীরে স্কুট চন্দ্রালোকে কাহার ছায়া দেখিলাম। কে এই জ্যোৎস্নাধোঁত নিশায় প্রাসাদোপরি পাদচারণ করিতেছে? বিশেষ করিয়া ছায়ার প্রতি নিরীক্ষণ করিলাম, জানিলাম এই ছায়া কাহার! প্রাঙ্গণের যে দিকে আমি দাঁড়াইয়া ছিলাম, সেই দিকের সম্মুখের ছাদেব আলিসার নিকট কুম্মিকা আসিয়া দাঁড়াইল— ছায়া অন্তর্হিত হইল। চন্দ্রালোকে উভয়ে উভয়ে দেখিলাম। ক্ষণপরে ধীরে ধীরে কুম্মিকা আসিয়া আমার পাশে দাঁড়াইল। তাহার অফুল্ল, আয়ত লোচন-যুগল আমার মুখের প্রতি স্থাপিত করিয়া কি দেখিতে লাগিল। জ্যোৎস্নালোকে সেই মুখ খানি দেখিয়া বিহ্বল-চিত্ত হইলাম। জিজ্ঞাসা করিলাম “কুম্ম! অমন করিয়া শূন্যমনে কি ভাবিতেছ?”

“কি জানি কি ভাবিতেছি! কত কি ভাবিতেছি

“ইহার অর্থ কি? আমাকে এখানে দেখিয়া বিস্মিত হইয়াছ?”

“হইয়াছি।”

“সেই জন্যই কি ভাবিতেছ?”

“না।”

“তবে কি, বল—তোমার সুন্দর মুখখানি মলিন দেখিলে আমার প্রাণ ফাটিয়া যায়, বল কি, ভাবিতেছ ।”

“বলিব—তাহা তোমাকে না বলিলে আমি বাঁচিব না, কিন্তু আগে তুমি বল তুমি আজি এখানে কেন ?”

“আমি তোমাকে দেখিতে আসিয়াছি, আর—”

“আর—কি বল ।”

“আর, তোমার বিবাহের পূর্বে তোমার নিকট শেষ বিদায় লইতে আসিয়াছি ।”

কুম্মিকার চক্ষু জলভারস্তুম্বিত হইল, বলিল, “আমার বিবাহ ! কাহার সঙ্গে ? জানি না অদৃষ্টে কি আছে !”

“কুম্ম ! কাঁদিও না । বিধাতার মনে যাহা আছে হইবে—কিন্তু তোমার মাতাই আমাকে নবীন জীবনে সংসারতাগী সম্মাসী করিলেন । জানি না আমার সহিত তোমার বিবাহ দিতে তাঁহার কিসের আপত্তি !”

“বসন্তকুমার ! কি করিলে শীঘ্র মৃত্যু হয় ?”

“তুমি অমন কথা যুখে আনিও না, আশীর্বাদ করি—জগদীশ্বর তোমাকে সুখী করুন ।”

“আমার আর সুখ কি ? জগতে তুমি ভিন্ন আমার আর সুখ নাই ।                      তোমাকে না দেখিতে পাইলে



প্রাণে মরিব। তুমি আমাকে ত্যাগ করিয়া সন্ন্যাসী হইবে—আমি কাহাকে দেখিয়া বাঁচিব ?”

“কুম্ভুম ! তোমাকে ত্যাগ করিতে হইবে—তুমি অন্যের হইবে ইহার চিন্তা মাত্রই আমার হৃদয়ে যে কি হয়, তাহা তুমি কি বুঝিবে ? আমি আর এ জ্বালা সহ্য করিতে পারি না, আজি তোমার মাতার চরণে খরিয়া সকল কথা বুঝাইব, তাঁহার নিকট তোমাকে ভিক্ষা করিয়া লইব ; ভিক্ষা পাই ভাল, না পাই বাত্যাভাঙিত পতঙ্গের ন্যায় দেশে দেশে ফিরিয়া এ যন্ত্রণাময় জীবনের অবসান করিব।”

কুম্ভুম কিছুই বলিল না। চিত্রাপিতের ন্যায় আমার মুখের প্রতি চাহিয়া রহিল। বলিল, “বসন্ত-কুম্ভুম ! কতদিন এই চাঁদের আলোয় কত মুখের কথা कहিয়াছি, আজি এ দুঃখ কেন ? আচ্ছা, সে সকল মুখের দিন কোথায় গেল ?”

“সেখানে সকলই গিয়াছে ও যাইবে।”

“সে কোথায় ?”

“অনন্তে—”

“অনন্ত কোথায় ? সেখানে কি যাওয়া যায় না ?”

“কেন, সেখানে যাইবার এত সাধ কেন ?”

“বুঝি যেখানে আমাদের সেই স্মৃতির দিন গিয়াছে  
সেই খানে বাইলে ছুঁয় জুড়াইবে ।”

“কুমুম ! তোমার অভিপ্রায় যদি তুমি নিজমুখে মাতার  
নিকট প্রকাশ করিতে না পার, নীলাঞ্জিকার দ্বারায়  
তাঁহাকে জানাইলে তিনি সকলই বুঝিতে পারিবেন,  
আর বোধ হয় তাহা হইলে তিনি অন্য স্থানে তোমার  
নিবাহের উদ্যোগ করিবেন না । নীলাঞ্জিকা তোমাকে  
ভগ্নীর অধিক ভাল বাসে, সে এ বিষয় তোমার মাতাকে  
আনন্দের সহিত বলিতে পারে ।”

“আমি নীলাঞ্জিকাকে একথা মার নিকট বলিতে  
অস্বপ্ন করিয়াছিলাম, কিন্তু তিনি আজি বলিব কালি  
বলিব করিয়া কেন আজিও বলেন নাই,—জানি না।”

“শোন, কুমুম ! আজি আমি তাঁহাকে সকল কথা  
বুঝাইয়া বলিব । আজি রজনীতে আমার ভাগা নিরু-  
পিত হইবে—তাঁহার একটা মাত্র কথার উপর আমার  
জীবনের প্রায় সমস্তই নির্ভর করিতেছে—” এইরূপ  
কথোপকথন হইতেছে, এমনত সময় ভগ্ননৌধোপরি পেচ-  
কের গম্ভীর কণ্ঠ শ্রুত হইল । কুমুমিকার মাতা কুমুমি-  
কাকে ডাকিলেন—তাঁহার স্বর অতি কোমল ও স্নেহ-  
ব্যঞ্জক । কুমুমিকার মাতা পীড়িতা । আমি কুমুমকে

তাঁহার মাতার পীড়ার কথা জিজ্ঞাসা করিলাম, শুনিলাম যে তাঁহার পীড়ার কিছুমাত্র উপশম হয় নাই। দিন দিন শরীর ক্রীণ হইয়া পড়িতেছে, রোগ চিকিৎসা মানিতেছে না। কুম্মিকা বাম্পাকুললোচনে, প্রায়াবরুদ্ধ স্বরে আমার হাত ধরিয়া কহিল—“এ জগতে আমার ছুঃখিনী মাতা ভিন্ন আর কেহই নাই।”

‘ভাবিও না, জগদীশ্বর তাঁহাকে রক্ষা করিবেন। তুমি এক্ষণে তাঁহার নিকট যাও, আমি পশ্চাৎ যাই-তেছি।’

কুম্মিকা তাঁহার মাতার গৃহে প্রবেশ করিবা মাত্র স্নেহময়ী মাতা তাঁহার মস্তক চুষন করিয়া কহিলেন, “কুম্ম ! তোমাকে আর ছুঃখ দিব না, আজি আমি তোমাদের সকল কথা দূরে থাকিয়া শুনিয়াছি। বসন্ত-কুম্মার, তোমাকে যে চিরজীবন ভাল বাসিবেন তাহা আজি আমি জানিয়াছি। আগে জানিতে পারি নাই বলিয়াই তোমার অন্যত্র বিবাহ দিতে চাহিয়াছিলাম, যেখানে বিবাহ দিতে চাহিয়াছিলাম, সেই খানে আমার এক ছোট ভগ্নী আছেন ; তিনি ভিন্ন এক্ষণে আমাদের বধার্থ আশ্রয় আর কেহই নাই। তাঁহার নিকট থাকিলে তুমি মাতৃস্নেহ পাইতে পারিবে ইহারই জনা

তোমার সেখানে বিবাহ দিব স্থির করিয়াছিলাম । যাহা  
 হউক, তুমি জন্মাবধি সুখের মুখ দেখে নাই, যাহাতে  
 তুমি সুখী হও আমি তাহাই করিব — বসন্তকুমারের  
 সচিবতই তোমার বিবাহ দিব । আমারও কাল পূর্ণ হইয়া  
 আসিল, এখন তোমার প্রফুল্ল মুখ না দেখিয়া মরিলে  
 আমার মরণেও সুখ হইবে না ।” আমি এই সকল  
 কথা গৃহদ্বারের পশ্চাতে হইতে শুনিলাম । কুম্মিকা  
 মাতার এই শেষোক্ত কথাগুলি শুনিয়া নীরবে  
 মাতৃপাশে বসিয়া অশ্রু বর্ষণ করিতেছিল । মাতা,  
 কুম্মিকাকে কাঁদিতে নিষেধ করিয়া বস্ত্রাঞ্চল দ্বারা  
 তাহার অশ্রুপ্লাবিত মুখখানি মুছাইয়া দিলেন । গৃহা-  
 ভ্যন্তরস্থ দীপালোকে দেখিলাম যে তাঁহারও বিক্ষারিত  
 নয়নযুগল হইতে অবিরল জলধারা পড়িতেছে । দেখিয়া,  
 প্রাণ বড়ই কাঁতর হইয়া উঠিল ; নিঃশব্দপদসঞ্চারে  
 গৃহদ্বার হইতে অপমৃত হইলাম । মানবদৃষ্টি পূর্ণসুখ  
 কোথায় ?

২৬শে ভাদ্র  
 ১২৭০ সাল ।

}

বসন্ত

বনস্তুকুমারের দ্বিতীয় পত্র।

সোদরপ্রতিম হরকুমার !

পত্র লিখিবার প্রণালী যিনি সৃষ্টি করিয়াছেন, তিনি আমাদের কতদূর ধনাবাদের পাত্র তাহা তোমাকে বলিয়া দিতে হইবে না। বন্ধু, দূরে থাকিয়া বন্ধুর সহিত আলাপ করিতেছেন ; সম্মান, বহুদূরে বিদেশে থাকিয়া বৃদ্ধ জনক জননীকে সংবাদদানে শীতল করিতেছেন ; প্রোষিতভর্তৃকা, বহুকাল পরে প্রাণপতির লিপি বন্ধে ধরিয়া তৃষিত হৃদয় তৃপ্ত করিতেছেন ; তাহাই বলিতেছি যিনি পত্রলেখা প্রণালী প্রথম উদ্ভূত করেন, তিনি আমাদের পরম প্রীতির পাত্র। হরকুমার ! তোমাকে আমার এই সাধারণ, আমার জীবনের কাহিনী জানিয়া রাখিতে হইবে। আমার এই জীবনকাহিনী জানিয়া তোমার কোন লাভেরই সম্ভাবনা নাই, তবে তোমাকে এই সকল কথা লিখিয়া আমি সুখী হই বলিয়া লিখি, নতুবা আমার জীবনকাহিনী মধ্যে এমন কিছুই নাই বাহা শুনিলে তোমার হৃদয়তন্ত্রী বাজিয়া উঠিবে ! তবে প্রত্যেক মনুষ্য-

জীবনই সুখ দুঃখে আবদ্ধ—জীবনের সেই সকল সুখ দুঃখ যদি অপর কেহ না জানিল, যদি দুঃখের ভার নীরবে হৃদয়ে বহন করিতে হইল, যদি অপর কেহ আমার সুখ দুঃখের জাগী না হইল, তবে আমি অপেক্ষা দুঃখী আর কে ? এ জগতে এমন কয়জন লোক আছে বাহারা পরের হৃদয় বুঝিতে পারে ? জগতের লোক পরের হৃদয় বুঝিতে পারে না । তুমি দুঃখ প্রকাশ কর, অনেকে আগ্রহসহকারে বিষণ্ণবদনে তাহা শুনিবে ; শুনিবে বটে, কিন্তু কয়জন তোমার হৃদয়ে প্রবেশ করিয়া তোমার প্রকৃত দুঃখ বুঝিবে ? যদি পৃথিবীর প্রতি হৃদয়, প্রতি হৃদয়ের জন্য কান্দিত, তাহা হইলে সংসারে দুঃখ থাকিত না—পৃথিবী স্বর্গ হইত । হরকুমার ! তুমি চিরকাল আমার দুঃখে দুঃখী ও সুখে সুখী বলিয়া জীবনের প্রতি মুহূর্ত্তে বাহা ঘটিতেছে তাহা তোমাকে জানাইতেছি ও চিরকাল জানাইব । বুধবার রজনীতে আমার নিরাশ হৃদয়ে আশার বীজ উৎপন্ন হইয়াছে, জগদীশ্বর আমার অদৃষ্টে অনন্ত দুঃখ লিখেন নাই ।

কুম্মিকার মাতা রুগ্নশয্যায় । তাঁহার পীড়ার অবস্থা কল্যা অপেক্ষা উত্তম । কুম্মিকা ও নীলমাজিকা সাধ্যমতে তাঁহার সেবা করিতেছে । নীলমাজিকা,

বিনোদবিহারী চট্টোপাধ্যায়ের কন্যা। বিনোদবিহারী বাবু প্রথম স্ত্রী বিয়োগের পর আর দ্বিতীয় সংসার করেন নাই। এক্ষণে তাঁহার সংসারে আর কেহই নাই, কেবল একমাত্র কন্যা নীলাঞ্জিকাই তাঁহার শূন্যগৃহ আলো করিয়া আছে। নীলাঞ্জিকা, কুম্ম-মিকা অপেক্ষা এক বৎসরের বড়, শরীরের গঠন দেখিয়া তাঁহাকে যুবতী বলিয়া ভ্রম হয়। নীলাঞ্জিকা সুন্দরী—তাঁহার রূপ শরীরে ধরে না। নীলাঞ্জিকা অবিবাহিতা—তাঁহার আজিও বিবাহ হয় নাই। বিনোদবিহারী বাবু লোকের কথায় কর্ণপাত করিবার পাত্র নহেন—তিনি বলেন, সংসারে আমার আর কেহই নাই, কেবলমাত্র ঐ কন্যা—আর কিছু দিন যা-ক, উহার বিবাহ দিয়া কাশীবাস করিব। কুম্ম-মিকা ও নীলাঞ্জিকা শৈশব হইতেই এক স্থানে লালিত ও বর্দ্ধিত। উভয়ে উভয়কে ভগ্নীর অধিক ভাল বাসে। দুই জনে সর্বদা একত্রে থাকে। কুম্ম-মিকার মাতা পীড়িতা হওয়া অবধি নীলাঞ্জিকা সর্বদা তাঁহার সেবা করে। স্বছাও তাঁহাকে কন্যানির্কিশেষে স্নেহ করেন। কুম্মমিকা ও নীলাঞ্জিকার তাঁহার মনে প্রভেদ জ্ঞান ছিল না। নীলাঞ্জিকা আমার কাছে

পড়িত, আমিও তাহাকে সম্পূর্ণ স্নেহ করি। প্রদোষ-  
কাল। গগন সাগরের অপর পারে সাক্ষ্য আদিত্য  
দিবা সতীর সহমরণের জন্য চিতাবহি সাজাইয়া-  
ছেন; দুই একটা তামরুক-চূড়ে সেই বহিছটা এখন  
দেখা যাইতেছে। দেখিতে দেখিতে বহিছটা অস্তহিত  
হইল—চিতাবহি বিবিল। সাক্ষ্যতির, কেবলমাত্র  
গগন ও রুকচূড় আধার করিয়াছে। নিম্নে এখনও  
অক্ষুট আলোক রহিয়াছে। আমি প্রাসাদোপরি  
বেড়াইতেছি। আমান্নিগের বাটীর পশ্চিম প্রান্তে সুরমা-  
সোপানাবলিশোভিত এক রহৎ পুষ্করিণী আছে।  
তাহার চারিদিকে তাম, তমাল, ঝাউ, তিস্তিড়ী, প্রভৃতি  
রহৎ রহৎ রুকের সারি। আমি ছাদের পশ্চিম প্রান্তে  
আসিবামাত্র, নিম্নে, অক্ষুট আলোকে দেখিলাম—  
সেই পুষ্করিণীর সুরমা সোপানোপরি বসিয়া নীলা-  
জ্জিকা কি ভাবিতেছে। ক্রমে এইরূপ থাকিয়া নীলা-  
জ্জিকা সোপান ত্যাগ করিয়া উঠিল। কুল তুলিতে  
আরম্ভ করিল। কুল তুলিয়া মালা গাঁধিতে লাগিল।  
অন্ধকার হইয়াছে মালা গাঁধিতে পারিল না। সে  
পুষ্পগুলি পুষ্করিণীর কালকলে ভাসাইয়া দিল। আবার  
সেই সোপানোপরি আসিয়া বসিল। পরে তাহার



কঠিনঃস্বত অক্ষুটক্রন্দনধ্বনি আমার কর্ণে প্রবেশ করিল । আজি ইহার কি হইয়াছে, একেলা একুপ অস্থির ভাবে কাঁদিতেছে কেন, জানিবার জন্য ধীরে ধীরে তাহার পশ্চাতে আসিয়া দাঁড়াইলাম । ডাকিলাম, নীলাঞ্জিকা !—বালিকা চমকিত হইয়া উঠিয়া দাঁড়াইল । আমি জিজ্ঞাসা করিলাম—নীলাঞ্জিকা ! কাঁদিতেছে কেন ? সে আমার মুখের প্রতি চাহিয়া চাহিয়া মুখ অবনত করিল, বোধ হইল যেন কিছু অপ্রতিভ হইয়াছে । আমি পুনরায় জিজ্ঞাসা করিলাম নীলাঞ্জ ! কাঁদিতেছিলে কেন ? নীলাঞ্জিকা কহিল—

“কই কাঁদি নাই ত ।”

“তোমার চক্কের পাতা এখনও ভিজা রহিয়াছে তুমি কাঁদি নাই ত কি ? বল, তোমার কি হইয়াছে।”

“আজি তুমি কুম্মিকার মাতাকে দেখিতে বাও নাই ?”

“গিয়াছিলাম, তাহাতে কি হইয়াছে ?”

“কিছুই হয় নাই ।”

“তবে জিজ্ঞাসা করিলে কেন ?”

“করিলাম ।”

“সে যাহা হউক, তুমি কাঁদিতেছিলে কেন ? তোমার

কি হইয়াছে আমাকে কি বলিবে না? আমি কি তোমায় ভাল বাসি না ?”

নীলাঞ্জিকা নীলাকাশ প্রতি চাহিল—নীল নৈশা-  
কাশে চাঁদ উঠিয়াছে। চন্দ্রালোকে দেখিলাম,—তাহার  
ফল্গেশ্বরতুল্য লোকনয়ন জলে পুরিয়া গিয়াছে।  
সে কাঁচল, “ভালবাসি বই কি। কিন্তু তুমি কি আমার  
এ দুঃখ বুঝিবে?”

“কেন নীলাঞ্জ, কেন? কবে আমি তোমার দুঃখ বুঝি  
নাই? কবে তোমার দুঃখ দেখিয়া কাঁদি নাই? তবে  
আজ কেন এ কথা বলিলে? তোমার কথায় বিলক্ষণ  
প্রকাশ পাইতেছে, তুমি অন্তরে কোন আঘাত পাই-  
য়াছ—তোমার প্রফুল্ল মুখমণ্ডল বিগলিত হইয়াছে, তোমার  
চক্ষুর কোলে কালিমা পড়িয়াছে, তোমার সে হাসি  
নাই। কুম্ভম বলিল, তুমি চুল বাঁধ না, কাহারও সহিত  
ভাল করিয়া কথা কহ না, সর্বদা অন্য মনে কি ভাব!  
তোমার এ দুঃখ কেন?”

নীলাঞ্জিকা, ইহার পর আর কিছুই বলিল না—  
কাঁদিতে কাঁদিতে আমার নিকট হইতে অপস্থতা হইল।  
আমি বিস্মিত হইলাম,—তাবিলাম, ইহার দুঃখ  
সামান্য কারণসম্ভূত নহে। হরকুমার! এই চিন্তাশূন্য

বালিকা-স্বপ্নে এ মর্কভেদী হুঃখ কিসের, কিছু বুঝিতে পার ?

তাং ২৭শে ভাদ্র  
১২৭০ সাল।

তোমারই  
বসন্ত কুমার।

• হরকুমার চট্টোপাধ্যায়ের পত্র।

ভাই বসন্তকুমার !

( ১ ) তোমার দুইখানি পত্র আসিয়া হাজির। তোমার প্রথম পত্র বলিতেছে, কুম্মিকা তোমার জীবনের সহচরী ধর্মপত্নী হইবেন। সুন্দর ! ইহাতে যে কি পর্যন্ত সুখী হইলাম, তাহা আর কি বলিব। আর তোমার দ্বিতীয় পত্রে, নীলাজিকার কথা উল্লেখ করিয়াছ, তাহার সবন্ধে স্পষ্ট কিছুই বুঝিলাম না। তুমি লিখিয়াছ, তাহার কষ্ট সামান্য কারণসম্প্রাত নহে। ভাল, মনুষ্য কাঁদে কেন ? অভাবে। বাঞ্ছনীয় পদার্থের অভাবে হুঃখের জন্ম। হুঃখ হইতে অশ্রুজল। এখন দেখিতে চাইবে, নীলাজিকার কিসের অভাব, কিসের হুঃখ ? নীলাজিকা, বিবাহের বয়স অতিক্রম

করিয়াছে । বয়সে রমণীহৃদয়ে প্রেমতৃষ্ণা জন্মে । সেই তৃষ্ণা নিবারণের অভাবে, হৃদয় মর্ষুশীড়িত হয় । আমার এই সিদ্ধান্ত গুনিয়া তুমি হাসিও না । তুমি, নীলাম্বিকার পিতাকে বলিয়া তাহার বিবাহের উদ্যোগ কর—তাহার বরণপাত্র দেখ ।

( ২ ) এক্ষণে আমার একটা কথা শুন । কালি বৈকালে হেম বাবুর বাগানে বসিয়া আছি । নিদাঘ-সমীরে বৃক্ষের শ্যামল পত্ররাজি মুখরিত হইতেছে, সমীরণ ভরে কোন কোন বৃক্ষাশ্রিতা মস্তিকা সোহাগে ছলিতেছে ; পুষ্করিণীর স্বচ্ছবক্ষ সমীরে ঐবৎ চঞ্চল হইতেছে, পুষ্করিণীর ক্ষাটিক বক্ষে হুই একটি বুধুদ দরিদ্র-হৃদয়াঙ্গুর্গত আশার ন্যায় নীরবে উঠিয়া দেখিতে না দেখিতেই মিলাইয়া বাইতেছে । পুষ্করিণীর চারি-ধারে বহুবিধ ফুলের গাছ । তাহাতে দেশী, বিলাতী অযুত কুমুম কুটীরা রহিয়াছে । খেত, পীত, রক্ত, জরদ নানা বর্ণের ফুলের রাশি । তন্মধ্যে দেশী ফুলই অধিক—যুধীকা, চম্পক, মল্লিকা; মালতী, সেউ-তির স্নুগন্ধে বাগান আমোদ করিতেছে । আমি একটা অশোক বৃক্ষমূলে বসিয়া আছি, তাহাতে স্তবকে স্তবকে অশোক ফুল কুটিরাছে । তাই বসন্ত ! কুমুমসুন্দরীগণ

রূপে গুণে আমার প্রাণ পাগল করিল। ভাবিলাম,  
 এই মোহিনী, পুষ্পসুন্দরীগণ কোথা হইতে আসিল!  
 বিধাতার স্ফটসৌন্দর্যের মধ্যে ইহারা অতুল! ইহা-  
 দিগের সহিত নারীজাতির তুলনা দেয়! ছি! ইহাদের  
 সহিত নারীজাতির তুলনা! নারীজাতির রূপে বিষ  
 আছে, ইহাদের রূপে বিষ নাই। নারীজাতি রূপের গর্ভ  
 করিয়া থাকেন, ইহারা রূপের গর্ভ জানেন না। ইহাদিগের  
 রূপ অতি পবিত্র ও তুলনা রহিত। কন্টকাকীর্ণ শুষ্ক  
 গোলাব মতিকা দেখিলে, কখনই বোধ হয় না যে ইহা  
 এমন সুন্দর রূপের রাশি প্রসব করিবে। কন্টকময়  
 নীরস শাখার অন্তরে এত রূপ কোথায় ছিল! বসন্ত-  
 কুমার! আজি রাশি রাশি ফুল ফুটিয়াছে—সৌন্দর্যের  
 পরাকাষ্ঠা। রাশি রাশি ফুল দেখিলে আমার বত স্রুথ  
 হয়, এত স্রুথ বুঝি আর কিছুতে হয় না। মরি! এত  
 রূপসী ফুলের রাশি, ইহারা কতক্ষণের জন্য পৃথি-  
 বীতে আসিয়াছে। ইহাদের জীবন অতি ক্ষুদ্র, মুহূ-  
 র্তের জন্য অন্য গ্রহণ করিয়াছে, মুহূর্তের মধ্যেই ইহাদের  
 ফুলভঙ্গ করাইবে। ইহার মধ্যেই জন্মিল, বর্জিত  
 হইল, কুটিল আবার শুকাইয়া বরিয়া পড়িল। কেহ  
 জানিল না, শুনিল না—নির্ভয়ে কাননের কোলে কুটিল,

শুকাইল । কেহ ইহাদের জন্য এক কোঁটা চক্কর জম ফেলিল না—মসুবাছলয় সেরূপ নহে । কুলটি কুটিলে কত সুন্দরী আসিরা হর্ষ প্রকাশ করিলেন, বলিলেন, “আহা! কি সুন্দর কুল কুটিয়াছে,” বলিয়া তাহাকে হস্ত-চ্যুত করিয়া খোপায় গুলিলেন—কুসুমসুন্দরী নিক্রপারে তাঁহার কবরীজুবা হইল । সুন্দরী সুখী হইলেন সন্দেহ নাই, কিন্তু কুলবানী হস্তচ্যুত হইয়া অকালে শুকাইল । ফুল শুকাইলে তাহার আদর থাকে না । সুন্দরী কুল শুকাইয়াছে দেখিয়া তাহাকে দূরে নিক্ষেপ করিলেন । মরি ! এই নির্মম সহসারে, কুসুমসুন্দরীগণ কেন জন্মে, কেন ফুটে, কেন শুকায় ! কুটিয়া এত শীঘ্র শুকায় কেন ? বুঝি, কঠোর মসুবাছলয় হইতে পরিভ্রাণের জন্য ! কতকগুলি আবার সাহস করিয়া ফুটে না—কোরক শুকায় । জলবুধুদ উঠিতে না উঠিতে মিলায় ; নীলাকাশে রামধনু এই হাসিল, এই ভুবিল । কুল কুটিতে কুটিতে শুকায়, ( কি এই কুল, কি নারীকুল ) । উষার সীমন্তে বাসুর্ষ্য কতকণ জলে ? পল্লবাণে শিশিরবৃষ্টি কতকণ হলে ? কোমল নীল গগনে চন্দ্রমণ্ডলের চারি ধার কখন কখন নিছোজল পীত বর্ণে রঞ্জিত হয়, তাহা কথায় তাহাকে “চন্দ্রের স্তম্ভ” বলে । নীলাকাশে চন্দ্রদেবের

সে বাহার, সে সৌন্দর্য্য কতকণ থাকে ? নিমেষমধ্যে  
সে বাহার, কোথায় লুকায় ; সে নয়নসিঞ্চকরী মধুর  
দিব্যসৌন্দর্য্য কোথায় ভাসিয়া যায় ! তাই বসন্ত ! বুঝি,  
যাহা কিছু সুন্দর—তাহাই কণস্থায়ী । সৃষ্টিকর্তা, মানব  
অদৃষ্টে সৌন্দর্য্যের পূর্ণভোগ লিখেন নাই । বালাকাল  
হইতে কত নব নব সৌন্দর্য্য নয়ন পথে পড়িয়াছে—  
তাহাদের মধ্যে কয়টি প্রাণ ভরিয়া দেখিতে পাইয়াছি !  
এ জনমে বুঝি ভাল করিয়া কিছুই দেখা হইল না ;—

“ভাল করি পেনন না ভেল ।

মেঘমালা সঞ্চে তাড়িত-লতা জম্বু

হৃদয়ে শেল দেই গেল ॥”

যাহা হউক, সেই কুসুমিত অশোকবৃক্ষমূলে বসিয়া, ফুল-  
কুলের নবীন ঢল ঢল রূপ দেখিয়া চিত্ত উদাস হইল ।  
সংসার ছাড়িয়া ইহাদিগকে লইয়া সম্মাসী হইব স্থির  
করিলাম । গৃহের নারীকুলের কথা মনে পড়িল । ভাবি-  
লাম, তাহার এতগুলি সুন্দরী সতিন হইলে সে গৃহ-  
পুস্পটী শুকাইয়া যাইবে । কিন্তু তাহার সুন্দরী সতিন-  
গুলির সহিত আমার প্রেম কিরূপ বুঝিতে পারিলে,  
কখনই শুকাইবে না । আমি তাহাকে বুঝাইয়া বলিব,  
যে এই কুসুমসুন্দরীগণের সহিত আমার পার্থিব প্রণয়

নাই, তবে উহাদিগের সৌন্দর্য্যে আমি মুগ্ধ, উহাদিগকে  
লইয়া সন্ন্যাসী সাজিতেও রাজি আছি ।

( ৩ ) তোমার বিবাহ হইবে । কবে হইবে ? দিন  
টির হইয়াছে কি না, লিখিবে । বিবাহের সপ্তাহ কাল  
পূর্বে আমাকে সংবাদ দিবে, আমি সস্ত্রীক যাইয়া  
তোমার বিবাহকার্য্য সমাধা করিব । বিবাহ হইলে,  
কৌলিক প্রথানুসারে তোমার ফুলশয্যাও হইবে । সেই  
দিবস, পুষ্পসুন্দরীগণ আসিয়া বর কন্যার প্রীতি সাধন  
করিবেন—ফুল সাজে ঝাজিয়া, ফুলের শয্যা রচনা করিয়া,  
ফুলবাসরে বর কন্যা পবিত্র প্রণয় রসে ভাসিবে । কত  
নারীকুল, তোমার ফুলবাসরে সরস মঞ্জলিস করিবে—  
গুচ ফুলময় হইবে । বিবাহ উৎসব মধ্যে ঐ একটি  
সুখের দিন । আমার জীবনের সে সুখবাসর চলিয়া  
গিয়াছে—তাহার মধুময় স্মৃতি আজিও আছে । তাই  
বলিয়া আমাকে “বিয়ে-পাগলা” মনে করিও না । আমি  
আর সে দিবসের কামনা করি না—জীবনে সে দিবস  
একবার আসাই ভাল । তোমার ফুলবাসরের শীঘ্র  
আয়োজন কর, বিবাহের দিন ধার্য্য হইলে আমাকে  
সংবাদ দিতে বিলম্ব করিবে না । অদ্য ইতি—

তাং ৬ই আশ্বিন  
১২৭০ সাল ।

}  
}

তোমারই  
হরকুমার শর্মা ।





এই যে সুগন্ধি অশোকস্তবক শ্যামল পত্রকোলে হাসিয়া  
 ঘুলিতেছে, কি করিলে কুমুমিকা ইহাদের ন্যায় হাসিবে !  
 ঐ যে কুমুদকুমুম অগ্নাদশবর্ষীয়া বালিকার ন্যায় ঈষদাব-  
 গুণন মুক্ত করিয়া ফুট ফুট ভাবে হাসিতেছে, কি  
 করিলে আমার কুমুমকুমুদ উহার ন্যায় সুখে হাসিবে !  
 এইরূপ ভাবিতেছি ও বেড়াইতেছি, ক্রমে সন্ধ্যা হইল ।  
 সাক্ষাদিতোর স্বর্ণ কিরণ এতক্ষণ গাছের পাতায়  
 পড়িয়া বিকমিক করিতেছিল, এক্ষণে পাতা ছাড়িয়া  
 শূন্যে ডুবিল—গাছের পাতা কাল হইল । সরসীর  
 কোলে হাঁসগুলি এতক্ষণ ভাসিয়া ভাসিয়া খেলা করিতে-  
 ছিল, তাহারা খেলা ছাড়িয়া তীরে উঠিল । পুকুরের  
 কাল জলে কাল ছায়া আরো কাল হইল—ক্রমে আরো  
 কাল—তাহার পর জলে ছায়া মিশিল । সাক্ষাপগনে  
 পথহারা সুন্দরীর ন্যায় একটা নক্ষত্র দেখা দিল ।  
 তখন আর অন্ধকারে থাকিয়া কি করিব ভাবিয়া গৃহে  
 ফিরিলাম । কুমুমকে দেখিবার জন্য অস্তঃপুরে প্রবেশ  
 করিলাম । অস্তঃপুরে এক কক্ষবাতায়ন পাখে তাহার  
 কণ্ঠস্বর শুনিলাম । স্বর শুনিয়া বাহির হইতে জানে-  
 লার ভিতর দিয়া দেখিলাম । দেখিলাম, আমার সেই  
 জীবন্তকুমুমরূপিনী, আর্গুনায়িতকুমলী, মাতৃশোকা-

তুরা কুম্মিকা, ভগ্নী জুবনমোহিনীর কণ্ঠে বাহুলতা  
বেটন করিয়া মুখ লুকাইয়া অক্ষুটে কাঁদিতেছে । জুব-  
নের চক্ষুও জলে পুরিয়াছে ; জুবন সশ্বেছে কুম্মি-  
কার কোমল চিবুক ধরিয়া বসনাগ্রভাগ দিয়া তাহার  
চক্ষুর জল মুছাইয়া দিলেন, কহিলেন, “তা আর  
কাঁদিলে কি হইবে বল ! কাঁদিলে ত কোন উপায় হইবে  
না । তুমি কাঁদিলে আমি কাঁদিব, দাদা কাঁদিবেন, ছিঃ !  
কাঁদিও না ।” কুম্মন বলিল, “আমি কি ইচ্ছা করিয়া  
কাঁদি ?”

“অমন কোরো না, ওসব জুলে যাও । দেখ,  
দাদা তোমাকে বড় ভাল বাসেন—তুমি কাঁদিলে  
তাঁহার চক্ষু দুইটি সৰ্বদাই ছল্ ছল্ করে । আচ্ছা,  
দাদার সহিত তোমার বিবাহ হইলে কি তুমি সুখী  
হইবে না ?”

“হইব টে কি ।”

“হইব টে কি ? ও কি রকম কথা, কি করিলে তুমি  
সম্পূর্ণ সুখী হও ?”

“ইহা অপেক্ষা আমার কিছুতেই অধিক সুখ হইবে  
না । কিন্তু—”

“কিন্তু কি বল, আমার কাছে তুমি কথা লুকাইবে ?  
তুমি কি আমাকে ভাল বাস না ?”

“তোমাকে ভাল বাসি না ত কি ! নীলাঞ্জিকাকে  
যেমন ভাল বাসি, তোমাকেও তেমনি ভাল বাসি ।  
তোমরা তিন আমার মনের কথা বলিবার আর কে  
আছে ?”

“আর একজন আছে ।”

“আচ্ছা, তোমার মুখে যদি আর কাহাকেও চির-  
জীবন কাঁদিতে হয় তাহা হইলে কি তুমি মুখী হইতে  
ইচ্ছা কর ?”

“একজনকে কাঁদাইয়া কি কখন মুখী হওয়া  
যায় !”

“আমার মুখ হইবে না—আমি মুখ চাই না ।”

“ইহার অর্থ কি, তুমি কাহার মনে ব্যথা দিয়াছ ?”

এই বলিয়া ভুবন, কুসুমিকার চিবুক ধরিয়া কহিল—  
“এমন কুসুমকোমল, সরল মুখ বাহার, সে কি কাহার  
মনে ব্যথা দিতে পারে ? কুসুম ! তুমি কি কেবল মার  
অন্যই ভাব ? আমার বোধ হয়, তোমার অন্তরে অন্য  
কোন ভাবনা প্রবেশ করিয়াছে । আর কি ভাব  
আমার মাথা খাও, আমাকে বল ।”

“ভাবি—আমার জন্যই আর একজনের সর্বনাশ  
হইবে!” .

“কাহার সর্বনাশ হইবে?”

কুম্মন কিছুই বলিল না। করকপোমবিন্যস্ত হইয়া  
কি ভাবিতে লাগিল। ভুবনমোহিনী, জিজ্ঞাসা করি-  
লেন—

“কি ভাবিতেছ, তোমার এ ছুঃখ কেন?”

“বিধাতার ইচ্ছা—”

পরে কুম্মিকা একটি পতনশীল নক্ষত্রের প্রতি  
নির্দেশ করিয়া কহিল,—“ভুবন! নক্ষত্রটি মনের ছুঃখে  
ধসিয়া পড়িল, না?”

“হইবে।”

“উহার মনে কিসের ছুঃখ?”

“তুমিই জান।”

“কেন তুমি কি কিছু জান না? তুমি কি আমার  
উপর রাগ করিয়াছ?”

“করিয়াছি!”

“কেন, আমি কি করিলাম?”

“তুমি আমাকে ভালবাস না বলিয়া।”

“তোমার মিথ্যা কথা—আমি তোমাকে ভালবাসি  
না ত কি ?”

“আমার সত্য কথা—তুমি আমাকে ভাল বাসিলে  
আমার নিকট কথা লুকাইবে কেন ?”

“পরের সুখের পথে আর কাঁটা হইব না, পরে  
কপালে বাহা আছে হইবে। তোমার নিকট আমি  
কথা লুকাইব না—তোমাকে সকল কথা বলিব কিন্তু আমি  
নহে” এই বলিয়া কুমিকা, ভুবনের নিকট হইতে  
চলিয়া গেল। আমিও কুমিকার বিষয় আন্দোলন  
করিতে করিতে বহির্জাতিতে আসিলাম। আমার ত  
একগকার সংবাদ এই। তোমার ও তোমার প্রিয়  
গৃহিণীর কুশল সংবাদ লিখিয়া সুখী করিবে। ইতি ।

তাং ৮ই কার্তিক  
১২৭০ সাল ।

তোমারই  
বসন্তকুমার ।

হরকুমার চট্টোপাধ্যায়ের পত্র ।

বন্ধুপ্রবর বসন্ত !

মনুষ্য বাহা আশা করে, প্রায় তাহা ঘটে না ।  
আমি আশা করিয়াছিলাম, সস্ত্রীক বাইয়া তোমার  
বিবাহ উৎসবে মাতিব, তাহা ত এক্ষণে কিছু দিনের জন্য  
হইতেছে না । তোমার ভগ্নী ও কুম্বিকার কথোপ-  
কথন সবিশেষ শুনিলাম । শুনিলাম বটে, কিন্তু শুনিয়া  
ছুঃখ হইল মাত্র । তোমারও মনের অবস্থা ভাল নহে,  
আমারও তাহাই । আজি দুই দিবস হইতে আমার  
হৃদয়ে কি এক অশান্তি বিরাজ করিতেছে । আমার এ  
হৃদয়াশান্তি কোথা হইতে আসিল, শুন । ইতিমধ্যে  
এক দিবস সন্ধ্যার পর জাহ্নবী তীরে বসিয়া আছি ।  
আকাশে চাঁদ উঠিয়াছে । নৈশবায়ু তাড়িত হইয়া  
পূৰ্ণসলিলা ভাগীরথী তর তর বেগে অনন্ত উদ্দেশে ছুটি-  
য়াছে । জাহ্নবীর রজত বক্ষে, চন্দ্রের রজত ছায়া ধর-  
ধর করিয়া কাঁপিতেছে । জাহ্নবীজল, জ্যোৎস্না  
মাখিয়া জ্বলিতেছে । সেই কোয়ুদীবিধৌত জাহ্নবীর  
বিশাল বক্ষে কতকগুলি খেত পল্লকোরক ভাসিয়া

যাইতেছিল । জাহ্নবীবক্ষে, এই পদ্মকোরকগুলি কোথা  
 হইতে আসিল জানি না । পদ্মগুলিন শুষ্ক ও  
 মলিন । নদীশ্রোতবাহিত, শ্বেতকমলসুন্দরীকুলের সেই  
 মলিন রূপরাশি দেখিয়া বজ্রের বালবিধবা নারীর  
 মুখ মনে পড়িল । ভাবিলাম এই জাহ্নবীশ্রোতবাহিত  
 কমলকোরকগুলি, পতিবির কোলে ফুটিতে না পাইয়াই  
 যেন অনাধিনীর ন্যায় নদীশ্রোতে ভাসিয়া যাইতেছে ।  
 আর বজ্রের কত পতিবিরোগবিধুরা জীবন্ত কমল,  
 ক্ষুটনোমুখ যৌবনে সংসারশ্রোতে ভাসিয়া যাইতেছে ।  
 নদীশ্রোতবাহী ছুখিনী কমলকুল ভাসিয়া ভাসিয়া  
 কোথায় যাইবে জানে না—সংসারশ্রোতবাহী ছুখিনী  
 কমলকুল ভাসিয়া ভাসিয়া কোথায় যাইবে জানে না ।  
 ইহাদের কেহ নাই, তাহাদেরও কেহ নাই । ইহাদের  
 দলরাজী নদীশ্রোতছিন্ন ; তাহাদিগের প্রফুল্ল দল-  
 রাজীও কঠোর সংসার শ্রোতে ছিন্ন ও বিগুচ্ছ । কাননের  
 কোলে, কত শত ভ্রমরভ্রম্মদিত কুমুমসুন্দরী সমী-  
 রণভরে ছলিতেছে ; কত শত কুমুদ, চন্দ্রকরে ফুটিতেছে,  
 কত যুধিকাকলি ও রজনীগন্ধার মুখ ফুটিতেছে, কত  
 চন্দ্রক কলিকা রূপের বাহার দিতেছে কিন্তু এই নদী-  
 শ্রোতবাহী, পতিবিরোগা, শ্বেতবসনা কমলকুল তাহা-



দের সহিত মিশিতে না পারিয়াই যেন দূরে নদী স্রোতে  
 গা ঢালিয়া দিয়াছে । তাহাদের সুখের দিন আছে—  
 তাহারা ফুটিতেছে, ছলিতেছে, হাসিতেছে । ইহাদের  
 সুখের দিন কুরাইয়াছে, তাহাদের হৃদয়ে ইহাদের হৃদয়  
 মিশিল না—ইহারা দুখিনীর ন্যায় দূরে নদী স্রোতে  
 ভাসিয়া চলিল । সংসারের কোলেও কত শত জীবন্ত  
 কুমুদ, যুথিকা, চম্পক, রজনীগন্ধা সুখের হিলোলে পতি-  
 কোলে সোহাগে গলিয়া ফটিতেছে—আর ঐ নদীস্রোত-  
 বাহী পদ্মকোরকের ন্যায় কত শত জীবন্ত কমল সংসার-  
 স্রোতে ভাসিয়া বাইতেছে । তাহারাও সংসারের  
 কুমুদ, যুথিকা, চম্পক, রজনীগন্ধার সতিত প্রাণ তরিয়া  
 মিশিতে পারে না । কুমুদ, যুথিকা, চম্পকের চল চল  
 সুখ দেখিয়া তাহাদের আঁধার হৃদয়ে কখন পূর্ব-সুখ-  
 স্মৃতি, কখনও নবসুখআশা বিছাতের ন্যায় চমকিত  
 হইয়া দেখিতে না দেখিতেই সেই মেঘাবৃত হৃদয়াকাশে  
 মিলাইয়া যায়—পরে দুঃখবর্ষে হৃদয় দক্ষ করিতে থাকে ।  
 ইহারই জন্য তাহারা যেন প্রাণ তরিয়া ইহাদের  
 সঙ্গে মিশিতে পারে না । কুমুদ, যুথিকা, চম্পক, রজনী-  
 গন্ধার সুখের দিন আছে ; তাহারা সংসারকে সুখের  
 সঙ্গীত শুনাইতেছে—সংসার তাহাদিগকে লইয়াই বাস্ত

—সংসার তাহাদিগের কলকণ্ঠে মোহিত ও তন্নয় । আর সংসারের বিধবাকমলগুলির স্নুখের দিন ফুরাইয়াছে তাহারা সংসারকে অহরহ শোকের সঙ্গীত শুনাইতেছে । স্নুখের সঙ্গীতে সংসার মোহিত ও তন্নয়, হুখিনী কমলকুমের শোকের ধ্বনি কে শুনে? শূন্য—তাহাদের বিবাদ সঙ্গীত মিশাইতেছে । তখন সেই চন্দ্রকরোজ্জ্বল জাহ্নবীতীরে বসিয়া নদীত্ৰোতবাহী কমলকুমের প্রীতি দেখিতে দেখিতে সঙ্গসা যেন দিব্যচক্ষু পাইলাম—প্রদোষ-কমলসম শত শত বঙ্গ বিধবার মলিন মুখচ্ছবি আমার চক্ষের উপর ঘুরিতে লাগিল । তাহাদের চক্ষু হইতে অবিরল জলধারা পড়িতেছে ; যেন সেই সকল অনাধিনী বঙ্গকামিনী সজল নয়নে সংসারকে ডাকিয়া বলিতেছে—“আমাদের চক্ষের জল কি শুকাইবে না?” সেই সকল মলিন মুখচ্ছবি আর দেখিতে সাহস হইল না । নৈশাকাশ প্রীতি চাহিলাম—আকাশ চন্দ্রকরে উজ্জ্বল, কিন্তু আমার হৃদয়ে—চন্দ্র, তারা সকল নিভিয়া গিয়াছে ; হৃদয় মধ্যে অন্ধকার হইয়াছে । জাহ্নবীর বিপুল প্রশান্ত স্মৃতি, চন্দ্রকরোজ্জ্বল আকাশের মোহিনী ছবি আমার হৃদয় পটে অঙ্কিত হইল না । সেই অন্ধকার, উদাস চিত্ত লইয়া গৃহে ফিরিলাম । হৃদয়ের সে অন্ধকার

আজিও বুচে নাই । যাহা হউক, তোমার সংবাদ জানিতে আমি বড়ই উৎসুক । কুম্মিকার মনের অবস্থা ভাল নহে ; তিনি কিরূপ থাকেন ও নীলাম্বিকারই বা সংবাদ কি, তুমি কুম্মিকার দুঃখের কথা কিছু জানিতে পারিয়াছ কি না, আমায় ক্রয় লিখিবে । আমি তোমা-  
দিগের সংবাদের জন্য বড়ই বাগ্র রহিলাম । পরে, প্রার্থনা করি তোমার বর্ষায়ান কুম্মিকমলটী যেন শীঘ্রই নববারিসিদ্ধিত কদম্বের ন্যায় প্রকল হয় । ইতি—

তাং ১২ই কার্তিক }  
১২৭০ সাল । } হরকুমার শর্মা ।

—

বসন্তকুমার মুখোপাধ্যায়ের পত্র ।

ভাবুকবর হরকুমার !

কালি নিশীথে উদ্যান মধ্য বেড়াইতেছি । রাত্রি  
ঘনাকার । আকাশে কতকগুলি গাঢ় কাল মেঘ ডাসিয়া  
বাইতেছে । বেড়াইতে বেড়াইতে কিয়দূরে সেই অন্ধ-  
কারময় উদ্যানমধ্য বাপীতটে—কাহার অস্পষ্ট মূর্তি  
দেখিতে পাইলাম । কে, দেখিবার জন্য নিকটে বাই-

লাম । তাহার নিকট না যাইতে যাইতেই সে উঠিয়া  
দাঁড়াইল, যে উঠিয়া দাঁড়াইল সে নীলাঞ্জিকা । আমি  
কহিলাম—“নীলাঞ্জিকে! তুমি এ অন্ধকারময়ী নিশীথে  
এখানে কেন?”

“কেন, অন্ধকারে কি বেড়াইতে নাই?” পরে ক্ষণেক  
ইতস্ততঃ করিয়া কহিল—“যাহাদের হৃদয়ে আলোক  
আছে তাহারা আলোকে ঘাউক ।”

“ভাল, তোমার হৃদয় অন্ধকার হইল কিম্বে তাহা  
কি শুনিতে পাই না?”

“মমুষ্য অকরুণ বলিয়া ।”

“কেন, কে তোমার প্রতি অকরুণ হইল?”

“যাহাকে প্রাণাপেক্ষা ভালবাসি—সেই ।”

“কাহাকে প্রাণাপেক্ষা ভালবাস? বল—আমার  
নিকট লজ্জা করিও না—বল ।”

নীলাঞ্জিকা কিছুই বলিল না; তাহার নীলেন্দীবর  
তুল্য লোচন যুগল আমার মুখের প্রতি স্থাপিত করিয়া  
কি দেখিতে লাগিল । আমি কহিলাম--

“অমন করিয়া অন্য মনে কি ভাবিতেছ?”

“ভাবিতেছি—কত দিন তোমার সম্মুখে এই বাপি-  
তটে মেঘের ঘোরাল ঘটা দেখিয়া মেঘবাতস্পৃষ্ট মহুরীর

নার প্রফুল্লিতা হইয়াছি, কিন্তু আজিকার এই মেঘে তোমার সম্মুখে ডুবিয়া মরিতে ইচ্ছা হইতেছে কেন ?”

আমি বিস্মিত হইলাম, কহিলাম—“আমাকে দেখিয়া ডুবিয়া মরিতে ইচ্ছা হইতেছে ! কেন, আমি তোমার কি করিয়াছি ?”

“তুমি আমার হৃদয়ে আগুন জ্বালিয়াছ ।”

হরকুমার ! তম্বুহর্ত্তে কণ্ঠদেশে উর্দ্ধফণা ফণী দেখিলে আমি অধিক চমকিত হইতাম না । আমি কহিলাম—“নীলাঞ্জিকা ! তোমার নিকট হইতে আমি একরূপ উত্তরের আশা করি নাই, আশা কি, স্নেহও ভাবি নাই । তুমি অপাত্রে তোমার প্রণয় নাস্ত করিয়াছ—তোমার আশা পূর্ণ হইবে না।” এই কথা পর, আমি উদ্যান মধ্যে মর্ষুপীড়িত হইয়া বেড়াইতে লাগিলাম । পরে নীলাঞ্জিকাকে কহিলাম—“শুন নীলাঞ্জিকা, তোমার এই বালিকা বয়স—এই বয়সে জীবনের সমস্ত সুখে জলাঞ্জলি দিও না । তুমি এ সকল কথা বিস্মৃত হও ।”

“বসন্তকুমার ! ভুলিয়া যাও কি ইচ্ছা করিয়া ভুলিয়া যায় ? আমি তোমাকে ভুলিতে পারিব না । তুমি আমাকে চিরকালের জন্য ছুঁতিনী করিও না ।”

“নীলাঞ্জিকা ! এখনও বলিতেছি সাবধান—ইচ্ছা

করিয়া হৃদয়ে বিষবীজ রোপণ করিও না । তোমাকে স্নেহ করি বলিয়া এত কথা বলিলাম, আর তুমি আমার সাক্ষাৎ পাইবে না ।”

“নির্দয় ! আমি তোমাকে কেন ভাল বাসিলাম ? ভাল বাসিলাম ত কুলিতে পারি না কেন ?”

আকাশে যে কতকগুলি কাল মেঘ ভাসিয়া বেড়াইতেছিল, তাহাদের সংখ্যা বৃদ্ধি হইল—সমস্ত আকাশ কাল হইল ; আমি আর সেখানে দাঁড়াইলাম না । হরকুমার ! নীলাজকাই কি কুম্বিকার ছুঃখের মূল ?

তাং ১৫ই কার্তিক  
১২৭০ সাল ।

তোমারই  
বসন্ত ।

বসন্তকুমার মুখোপাধ্যায়ের দ্বিতীয় পত্র ।

প্রিয় হরকুমার !

আজি সপ্তাহকাল হইল তোমাকে এক খানি পত্র লিখিয়াছি ; আজিও তোমার কোন সংবাদ পাইলাম না কেন ? আমার এখানে আর এক ঘটনা উপস্থিত । জগদীশ আমার হৃদয়ে শান্তি দিবেন না । আজি দুই দিবস

হইল আমার কুম্মিকা আমাকে ত্যাগ করিয়া কোথায় গিয়াছে জানি না । তার অনেক অনুসন্ধান করিতেছি কিন্তু কিছুতেই ফল দর্শিতেছে না । কুম্মিকার হৃদয় আমি আজিও বুঝিয়া উঠিতে পারিলাম না । কি অপরাধে কুম্মম আমাকে ত্যাগ করিল ? কুম্মম কি আমাকে সন্দেহ করিয়াছিল ? কিসের সন্দেহ ? নীলাজিকুর সম্বন্ধে কি কোন সন্দেহ করিয়াছিল ? হইবে । আমার স্মরণ হইতেছে, এক দিন সে আমার ভয়ীর নিকট বলিয়াছিল—‘পরের সূখের পথে আর কাঁটা হইবে না ।’ কাহার সূখের পথে সে কাঁটা হইবে না ? নীলাজিকার সূখের পথে ? তবে কি কুম্মম মনে করিয়াছিল যে আমি নীলাজিকার প্রণয়াকাম্বী ? বুঝি তাহাই—নতুবা আমায় ত্যাগ করিয়া যাইবে কেন ? সন্দেহ কি ভয়ানক বিষ । আর এ সন্দেহের ভিত্তিই বা কোথায় ? আমি ত কিছুই বুঝিয়া উঠিতে পারিতেছি না । নীলাজিকা তাহার মনের দুঃখ কুম্মমকে বলিয়া থাকিতে পারিবে, তাহাতেই বা কি হইয়াছে, আমার প্রতি কুম্মমের সন্দেহের সেই কি বধেই কারণ ? জানি না, নির্মোখ বালিকা কিরূপ বুঝিয়াছিল । বাহা হউক, আমি আজি দ্বিপ্রহরে বাহিরীতে বসিয়া চিন্তাকুল

হৃদয়ে এই সমস্ত ভাবিতেছি, এমনত সময় বেচারাম নামক জনৈক ভৃত্য আসিয়া কৃষ্ণিতভাবে আমাকে একখানি পত্র দিল । পত্র খানির শিরোনামায় নীলাঞ্জিকার নাম লিখিত—হস্তাকর দেখিয়া আমি চমকিত হইলাম । বেচারামকে বলিলাম—‘তুই এ পত্র কোথায় পাইলি?’ সে কহিল, আজি দুই দিবস হইল কুমুমিকা তাহাকে এই পত্রখানি নীলাঞ্জিকার নিকট দিয়া আসিতে কহে, কিন্তু তাহার কি কার্য্য কৰ্ত্তব্যঃ সে পত্র পৌছাইয়া দিতে পারে নাই—একগুণে আমার নিকট লইয়া আসিয়াছে । আমি তাহাকে বিদায় দিয়া পত্রখানি পাঠ করিলাম । হর-কুমার ! কুমুম, নীলাঞ্জিকাকে কি এতই ভাল বাসে যে তাহার সুখের জন্য আমাকে পর্য্যন্ত ত্যাগ করিল ! না, আমার প্রতি সন্দেহই প্রধান মূল, ইহা একটা ওজর মাত্র ? কুমুমের লিপি খানি আমি রাখিলাম, তাহার নকল তোমাকে পাঠাইতেছি—

কুমুমিকার পত্র ।

প্রিয় ভগ্নি !

কাহারও মনে বাধা দিতে নাই । তুমি আমার, অপর কেহ নহ—প্রিয় নই—প্রাণের ভগ্নী । তোমার



মনে আমি ব্যথা দিব? আজি কালি তোমার মুখ দেখিলে আমার প্রাণ কাটিয়া যায়—তোমার আহার নিজ্রা এক প্রকার বন্ধ হইয়াছে। ভগ্নী! তুমি বাহার জন্য কাঁদিতেছ, তিনি কি তোমার জন্য কাঁদেন? বুঝি, আমার জন্য তিনি কাঁদিতে পারেন না। আমি তোমার সুখের পথে প্রধান বন্টক। আমি এখানে থাকিলে, তোমার স্বর্ভার কারণ হইব। আমি এখানে থাকিতে, তুমি বসন্তকুমারকে পাইবে না। আমি চলিলাম—কোথায় চলিলাম জানি না। বিধাতার নিকট প্রার্থনা, তুমি বসন্তকুমারকে বিবাহ করিয়া সুখী হও। আমার—আমার জন্য দুঃখ করিও না—আমাকে মনে করিয়া কাঁদিও না।

তোমারই

হিতার্থিনী ভগ্নী

কুম্মিকা।

হরকুমার! এই বালিকার হৃদয় অপূর্ণ। নীলাঞ্জিকাকে সুখী করিবার জন্য সে আমাকে ত্যাগ করিয়া গেল। কুম্মম আমাকে ভাল বাসিত না—আমি প্রতারিত হইয়াছি। কিন্তু আমি ত তাহাকে না দেখিয়া বাঁচিব না।

এত বন্ধেও কোন অনুসন্ধান হইল না, কুম্মিকার ড আর কেহই নাই, সে কোথায় আশ্রয়-লইল, আমি বিস্মিত হইয়াছি ! তাহার সবন্ধে আমার আশঙ্কা হই-  
 তেছে । নির্বোধ বালিকা ইচ্ছা করিয়া বিপদাগার  
 সংসার সমুদ্রে ঝাঁপ দিয়াছে । হাঁ—আর এক কথা,  
 যখন আমি কুম্মিকার পত্র পড়িতে ছিলাম, নীলাঞ্জিকা  
 আসিয়া আমার সম্মুখে দাঁড়াইল । তাহার মুষ্টি  
 বিষণ্ণা, কাতর স্বরে আমাকে কহিল—“কুম্মিকার কোন  
 সংবাদ পাইলে কি ?” আমি কুম্মিকার পত্র, নীলা-  
 ঙ্জিকার হস্তে দিয়া কহিলাম—“কোথায় সংবাদ পাইব ?  
 তুমি আমার সর্বনাশ করিলে ! এই পত্র পড় ।” নীলা-  
 ঙ্জিকা পত্র পড়িয়া কাঁদিতে লাগিল । আমি বলিলাম—  
 “কুম্মম, তোমারই জন্য আমাকে ত্যাগ করিয়া গেল ;  
 তুমি কালায়ুখী তোমার মনের পাপ কেন তাহাকে জানা-  
 ইয়াছিলে ?” নীলাঞ্জিকা কিছুই বলিল না—কাঁদিতে  
 কাঁদিতে বাহির হইয়া যাইতেছিল—আমি তাহাকে  
 ডাকিলাম, কহিলাম—‘নীলাঞ্জিকে, কিছু মনে করিও না ;  
 আমার মনের স্থিরতা নাই—তোমাকে একটা রুঢ় কথা  
 বলিয়াছি ।’ নীলাঞ্জিকা কহিল—‘বসন্তকুমার ! কুম্ম-  
 মিকা মানবী নহে—কুম্মিকা দেবী ! আমি কালায়ুখী না

হইলে আজি এ সর্বনাশ ঘটবে কেন !” আমি কহি-  
লাম—“তুমি আমার সম্মুখ হইতে বাও—আমার  
চিত্তের স্থিরতা নাই ।” নীলাজিকা, কাঁদিতে কাঁদিতে  
গৃহ হইতে অপসৃত হইল । হরকুমার ! নীলাজিকা  
আজি কালি আমার চক্ষের শূল হইয়াছে, তাহার মুখ  
আমি ভাল করিয়া দেখিতে পারি না । প্রায়ই তাহাকে  
অনর্থক ভৎসনা করিয়া থাকি, তাহার চক্ষু জলে পুরিয়া  
যায়, আমি কি করিব !

তাং ২৩ শে কার্তিক  
১২৭০ সাল ।

}

তোমারই  
বসন্ত কুমার ।

পুঃ—

কুম্মিকার সন্ধানের ক্রটি করিতেছি না । প্রতি  
গ্রাম, জেলা, কাঁড়ি, হাট, বাজার ও স্নানের ঘাটে  
তাহার সন্ধানার্থ লোক নিযুক্ত করিয়াছি, সংবাদ  
পত্রিকায় পুরস্কার ঘোষণা করিয়া বিজ্ঞাপন পর্য্যন্ত  
দিইয়াছি । কিছু দিন দেখি ইহাতে কি ফল দর্শে,  
পরে কুম্মের অন্বেষণার্থে দেশভ্রমণী হইব ।

বসন্ত ।

## হরকুমার চট্টোপাধ্যায়ের উত্তর।

অভিন্ন-হৃদয় বসন্ত!

তোমার দুই খানি পত্র পাইয়াছি। তোমার প্রথম পত্রের উত্তর এক্ষণে কিছুই লিখিলাম না। সে বিষয়ের আন্দোলনে এক্ষণে প্রয়োজন নাই। কুম্মিকার ভালবাসার প্রতি তুমি সন্দেহ করিয়াছ। তুমি লিখিয়াছ, “আমি প্রতারণিত হইয়াছি—কুম্মম আমাকে ভাল বাসিত না।” তোমার এ সিদ্ধান্ত ভ্রমাত্মক। তুমি সে পবিত্র ভালবাসায় সন্দেহ করিও না, তুমি প্রতারণিত হও নাই। কুম্মিকার শুকুমার হৃদয়ে নিঃস্বার্থ-পরতা ও পরহুঃখকাতরতা বড়ই প্রবল—এই দুই স্বর্গীয় বৃত্তির আবল্যে কুম্মম পরোপকার মন্দিরে আপন হৃৎপিণ্ড ছিঁড়িয়া বলি দিয়াছেন। যাহা হউক, তুমি অধীর হইও না, কুম্মিকা যেখানেই থাকুন না কেন, তিনি তোমাকে না দেখিয়া কয়দিন থাকিতে পারিবেন! আমি শীঘ্রই দেবপুর বাইবার জন্য রওয়ানা

হইব । আমি তোমার নিকট পৌঁছিবার পূর্বে তুমি  
কদাচ দেশত্যাগ করিও না । ইতি—

তাং ২৬শে কার্তিক )  
১২৭০ সাল । }

তোমারই মঙ্গলপ্রার্থী  
হরকুমার শর্মা ।

### বসন্তকুমার মুখোপাধ্যায়ের পত্র ।

বন্ধুবর হরকুমার !

যে দিবস তোমার পত্র পাইলাম, তৎপর দিবস  
সন্ধ্যাকালে আমি গৃহত্যাগ করিয়া কুম্বের অন্বেষণার্থ  
বাহির হইলাম । গৃহে মন তিষ্ঠিল না । তোমার  
আসিবার কাল পর্য্যন্ত আমার দুর্বল হৃদয় অপেক্ষা  
করিল না । তাহার পর, দেখিতে দেখিতে দুই চারি  
দিবস অতিবাহিত হইল । এক দিবস নিশীথে একটি  
জনশূন্য গ্রামে আসিয়া উপস্থিত হইলাম । গ্রাম অঙ্গল-  
ময় । সেই অঙ্গল মধ্যে স্থানে স্থানে দুই এক খানি ভগ্না-  
টালিকা অক্ষুটচন্দ্রালোকে বিকৃত মূর্তি লইয়া দণ্ডায়-  
মান রহিয়াছে—তাঁহাতে একগনে মনুষ্য বসতির কোন  
চিহ্ন লক্ষিত হইতেছে না । গ্রামের সর্বত্রই অঙ্গল ;

সেই জঙ্গল মধ্যে স্থানে স্থানে ভগ্ন সৌধস্তু, ভগ্ন কুটীর—  
 একগুণে মনুষ্য বসতির চিহ্নমাত্র বিরহিত । অক্ষুট  
 চন্দ্রালোকে বন্যায়ু বিত্যাড়িত বৃক্ষপত্রের বর্ বর্ শব্দ  
 ও মধ্যে মধ্যে বন্যপশুর কর্শ কণ্ঠ শুনিতে শুনিতে  
 সেই ভয়াবহ লোকশূন্য গ্রাম অতিক্রম করিয়া এক  
 জলাভূমির উপর দিয়া চলিতে লাগিলাম । তাহার  
 চতুর্দিকে চাহিয়া দেখিলাম, কোথাও কোন গ্রামের  
 চিহ্ন আছে কি না । কোথাও কোন গ্রামের চিহ্ন লক্ষিত  
 হইল না । দেখিলাম, যে স্থান দিয়া আমি চলিতেছি  
 উহা এক বিস্তীর্ণ প্রান্তর । আকাশে চাঁদ উঠিয়াছে ।  
 পূর্ণচন্দ্র নহে—আলোক অক্ষুট, জ্যোৎস্না কখন কুটি-  
 তেছে কখন মুদিতেছে । সেই অক্ষুট আলোকে, দূরে,  
 সম্মুখে ছায়ার ন্যায় কল্ককণ্ঠ দীর্ঘ মনুষ্যমূর্তি  
 লক্ষিত হইল । আমি চলিতে লাগিলাম । ভাবিলাম,  
 ইহার মন্দ লোক হইলেও হইতে পারে । পরে আর  
 অগ্রসর না হইয়া ক্রমে সেইখানে অপেক্ষা করিলাম ।  
 পুনরায় চলিতে আরম্ভ করিলাম, কিন্তু সেই সকল দীর্ঘ  
 ছায়া আর দেখিতে পাইলাম না । তাহারা কোথায়  
 গেল ? প্রান্তর পার হইয়া গিয়া থাকিবে ! কিন্তু মাঠের  
 সীমার ত কোন চিহ্ন দেখিতেছি না, পথজ্ঞম হইল কি

মা বুঝিতে পারিলাম না । অবিরাম চলিতে লাগিলাম—  
 বাইতে বাইতে কিয়দূরে, সম্মুখে ঘনরুদ্ধশ্রেণী অন্ধকারে  
 প্রাচীরবৎ লক্ষিত হইল, দেখিলাম সেইখানেই মাঠের  
 শেষ হইয়াছে । মাঠ পার হইয়া একখানি গ্রামে প্রবেশ  
 করিলাম । গ্রামের কিয়দূর না বাইতে বাইতেই সেই  
 নিশীথ নিস্তব্ধতা ভঙ্গ করিয়া এক ভয়ানক হুঙ্কার ধ্বনি  
 হইল । নৈশাকাশে তাহার কঠোর প্রতিধ্বনি না মিলা-  
 তেই দেখিলাম এক জন লোক রুদ্ধশ্বাসে দৌড়াইয়া  
 আসিতেছে । সে আমার নিকট আসিয়া ধমকিয়া দাঁড়া-  
 ইল ; বলিল, “কে তুমি ? কোথায় বাইতেছ ? শীঘ্র  
 পলাও ।” আমি বলিলাম—“কি হইয়াছে ?” সে বলিল  
 —“গ্রামে ডাকাইত পড়িয়াছে, আমার সর্বনাশ হই-  
 য়াছে, প্রাণের মায়ায় পলাইতেছি ।” প্রান্তরবিহারী  
 সেই সকল দীর্ঘমুখা মূর্তির কথা আমার স্মরণ হইল,  
 ভাবিলাম এ দসু্য তাহারাই । আমি বলিলাম—“আমি  
 বিদেশী, পথিক, কোথায় পলাইব ? কে আমায় আশ্রয়  
 দিবে ?” এই সময় আবার সেই ভয়াবহ হুঙ্কার ধ্বনি  
 শ্রুত হইল । আগন্তুক কহিলেন, “এখানে আর  
 দাঁড়াইও না, প্রাণের মায়া থাকে ত আমার সঙ্গে  
 আইস ।” এই বলিয়া তিনি দৌড়াইতে লাগিলেন ।

আমিও কিংকর্তব্যবিমূঢ়ের ন্যায় তাঁহার অনুসরণ করি-  
লাম। ক্রোশাধিক পথ অতিক্রম করিলে, আমার  
সঙ্গী কহিলেন, “এইখানে একটু বিশ্রাম করুন—এই স্থান  
অতি নিরাপদ ও নির্জন।” আমি কহিলাম—“আপনার  
গৃহে দম্মা প্রবেশ করিবারে, আপনি এখানে বিশ্রাম  
করিবেন কি প্রকারে? আপনার গৃহে কি কেহ নাই?”  
আগন্তুক কহিলেন—

“দুইটি অনাধিনী স্ত্রীলোক আছেন।”

“তাঁহারা আপনার কে?”

“তাঁহারা আমার কন্যা, তাহাদের যে কি হইল  
বুঝিতে পারিতেছি না। গৃহ ছাড়িয়া পলাইবার কালীন  
তাঁহাদের বিস্তর অনুসন্ধান করিয়াছিলাম, কিন্তু কোথাও  
তাঁহাদের দেখিতে পাই নাই। আমি অনেকের সর্জনশ  
করিয়াছি—জীবনে অনেক পাপ সঞ্চয় করিয়াছি, আমার  
সর্জনশ হইবে না ত কাহার হইবে? দম্মাহস্তে, আমার  
মৃত্যু হইলে আমার পার্শ্বের সমুচিত প্রায়শ্চিত্ত হইত।  
আমি পলাইলাম কেন?” এইরূপ কথোপকথনে সেই  
ভীমা রজনীর অবসান হইল। দেখিলাম, আমরা এক  
উচ্চ ভূমিখণ্ডে বসিয়া আছি, তাহার চতুর্দিকে অসংখ্য  
খর্জুর বৃক্ষের সারি। সেই ভূমিখণ্ডের নিম্নে দুই



ধারে প্রশস্ত ময়দান—ময়দান প্রান্তে আবার ঐরূপ উচ্চ ভূমিখণ্ড, ত্রাহার চারিদিকেও ঘন খর্জুরের সারি । দেখিতে দেখিতে সেই অসংখ্য খর্জুর স্বকচূড় স্বর্ণ-কিরণ মণ্ডিত হইয়া জ্বলিতে লাগিল । তখন সেই স্বর্ণ-কিরণ মণ্ডিত অসংখ্য খর্জুর স্বক হইতে অসংখ্য বন্য-পক্ষী প্রভাত পবনে ডাকিয়া উঠিল । প্রভাত চইলে দেখিলাম—আমি যাঁহার নিকট বাসিয়া আছি, তাঁহার বয়স হইয়াছে—বয়স প্রায় ষষ্ঠী বৎসর । কিন্তু শরীর বিলক্ষণ বলিষ্ঠ ও সবল ; খস্মাকৃতি, কৃষ্ণবর্ণ, কেশগুলি অধিকাংশই কাশকুম্ভসঙ্কাশ । আমি তাঁহাকে কহিলাম,—“প্রভাত হইয়াছে, গ্রাম মধ্যে গিয়া আপনার কন্যাঘরের সন্ধান করা কর্তব্য ।” তিনি স্বীকৃত হইলেন । আমরা গ্রামাভিমুখে চলিলাম । পশ্চিমধ্যে রামকুমার বাবু আমার নাম ও নিবাস জিজ্ঞাসা করিলেন । ইঁহার নাম রামকুমার দত্ত । আমি, আমার নাম ও নিবাস তাঁহাকে বলিলাম । তিনি বিস্মিতের ন্যায় আমার মুখের প্রতি চাহিলেন, কহিলেন—“আপনিই কি দেবপুরের বসন্তকুমার মুখোপাধ্যায় ? আপনি কি স্বর্গীয় চন্দ্রকুমার মুখোপাধ্যায়ের পুত্র ?” আমি বিস্মিত হইলাম, কহিলাম—“মহাশয় আমাকে কিরূপে জানিলেন ?”

“সে একগণকার কথা মঃহ ।” তাহার পর কহিলেন—  
 “আমি দেবপুরে, স্বর্গীয় বিশ্বনাথ বন্দ্যার সংসারে বহু  
 দিবস ছিলাম । আপনাকে আমি নিতান্ত শিশু দেখিয়া-  
 ছিলাম ।” আমি তাঁহাকে জিজ্ঞাসা করিলাম—“মহাশয়,  
 বিশ্বনাথ বাবুর সংসারে বহু দিবস ছিলেন, বলিতে  
 পারেন, কে, তাঁহাদের একরূপ সর্জনশ করিয়াছে ?”  
 রামকুমার বাবু কিঞ্চিৎ ইতস্ততঃ করিয়া কহিলেন,  
 “উক্ত বিষয়ে বহুবিধ প্রবাদ আছে ; কিন্তু হরিহর ঘোষা-  
 লই প্রকৃত পক্ষে তাঁহার সর্জনশ করিয়াছে ।”

“এই প্রবাদ কি সত্য ?”

“আমরা বহুদিবসের লোক । আমরা বিশেষ জানি  
 এই প্রবাদ সম্পূর্ণ সত্য ।” এই কথার পর তিনি আর  
 কিছুই বলিলেন না—ক্রতপাদবিক্ষেপে চলিলেন । ক্রমে  
 গ্রামাত্যন্তরে প্রবেশ করিলাম । তাহার পর উভয়ে এক  
 বৃহৎ আমুকানন মধ্যে আগিয়া উপনীত হইলাম ।  
 দ্বিপ্রহরেও তাহার তিতর অঙ্ককার । সেই প্রায়া-  
 ঙ্গকার আমুকানন মধ্যে এক বৃহৎ পুষ্করিণী ; তাহার  
 ইষ্টক নির্মিত রানার উপর এক স্ত্রীমূর্তি । নিকটে  
 ঘাইয়া বাহা দেখিলাম, তাহাতে স্তম্ভিত ও বিস্মিত হই-  
 লাম, দেখিলাম—সেই স্ত্রীমূর্তি—কুম্মিকা । রামকুমার

বাবু कहিলেন, “অগদীশ্বরের কৃপায় আমার একটি কন্যার সন্ধান পাইলাম ।” পরে, কুম্মিকাকে, তাঁহার অপর এক কন্যার কথা জিজ্ঞাসা করিলেন । কুম্মিকা, তাঁহার কন্যার কথা কিছুই বলিতে পারিল না । রাম-কুম্মার বাবু তাঁহার কন্যার জন্য বাজকের নায় রোদন করিতে লাগিলেন । পরে কিঞ্চিৎ শান্ত হইয়া, কুম্মিকার প্রতি নির্দেশ করিয়া, আমাকে कहিলেন, “আপনি ইহাকে এখানে দেখিয়া বিস্মিত হইবেন না । এক্ষণে আপনি কিয়ৎক্ষণের নিমিত্ত এই খানে অপেক্ষা করুন, আমি একবার গৃহ হইতে আসি ।” আমি कहিলাম, “আপনার গৃহ এখান হইতে কত দূর ?” তিনি বলিলেন, “অতি নিকট ।” তাঁহার পর, তিনি সেই আমুকানন ত্যাগ করিয়া গৃহাভিমুখে গমন করিলেন । সেই প্রায়াক্ষকার আমুকানন মধ্যে কুম্মিকা ও আমি । কুম্মম আমাকে একটা মুখের কথাও জিজ্ঞাসা করিল না । তাঁহার ক্ষুদ্র বদন মণ্ডল অক্ষয়মে প্রাবিত হইতে লাগিল । আমি জিজ্ঞাসা করিলাম, “কুম্মম কাঁদিতেছে কেন ? আমাকে দেখিয়া কি চুঃখিত হইয়াছে ?”

“তোমাকে দেখিয়া চুঃখিত হইব কেন ? দিদির জন্য আমার প্রাণ কেমন করিতেছে—তাঁহার বে কি হইল !”

“দিদি, কে ?”

“যাঁহার গৃহে ছিলাম—তাঁহারই কন্যা।” এই কথার পর, কুমুম নীলাঞ্জিকার কথা জিজ্ঞাসা করিল, বলিল—“নীলাঞ্জিকা কেমন আছে ?” আমি বিরক্ত হইলাম। বলিলাম—“জানি না, বোধ হয় ভাল আছে।”

“তুমি কি তাহাকে ভাল বাসিবে না ?”

“কেন, আমি কি তাহাকে ভাল বাসি না ? তবে তুমি যে ভালবাসার কথা বলিতেছ সে ভালবাসা, বসন্তকুমার, জীবনে তোমা ভিন্ন আর কাহাকেও দেয় নাই, দিবে না। কিন্তু তুমি তাহা গ্রহণ করিতে চাহ না—বলিতে পারি না, আমার ভালবাসা তোমার গ্রহণ যোগ্য কি, না।”

কুমুম, আমার পদযুগল ধরিয়া কাঁদিতে কাঁদিতে কহিল; “আমার অদৃষ্ট গুণে তোমার ভালবাসা পাই-  
য়াছি ; আর, তোমাকে আমি ভালবাসি কি না কি  
প্রকারে বুঝাইব ! বিধাতা আমার জিহ্বায় বল দেন  
নাই।” আমি কহিলাম, “কুমুম ! জিহ্বার বলে ভাল-  
বাসা বুঝান যায় না। তুমি আমাকে ভাল বাসিলে  
আমাকে ত্যাগ করিবে কেন ?”

“আমি ত তোমাকে ত্যাগ করি নাই—নীলাঞ্জিকার সহিত তোমার বিবাহ হইলে, আমি গিয়া তোমার চরণ সেবা করিতাম । আমি তোমাকে না দেখিয়া কয়দিন বাঁচিতে পারিতাম ।” আমি কহিলাম, “কুমুম ! তোমার এই ক্ষুদ্র হৃদয় এত কোমল ও এত সুন্দর তাহা আমি জানিতাম না । পরের সুখের জন্য তোমাকে এত দূর ত্যাগ স্বীকার কে শিখাইল ? কিন্তু আজিও তোমার বালিকা বুদ্ধি ঘুচে নাই—তাহা না হইলে, তুমি আমার চক্ষের অন্তরাল হইলে আমি নীলাঞ্জিকার হইব, তুমি একরূপ বুঝিবে কেন ? যাহা হউক, যদি আজিও এ চিন্তা তোমার মনমধ্যে থাকে, পরিত্যাগ কর ।” এইরূপ কথা শ্রমক্ষে প্রায় দুই ঘণ্টা অতীত হইল । রামকুমার বাবু আসিয়া উপস্থিত হইলেন । শুনিলাম, তাঁহার কন্যার কোন সন্ধান পান নাই । বিমর্ষভাবে আমাকে কহিলেন—

“আপনি কুমুমিকাকে লইয়া দেবপুর যাত্রা করুন । এখান হইতে গঙ্গা অধিক দূর নহে, সেইখানে নৌকা করিয়া দিব, নৌকাযানে দেবপুর পৌঁছিতে প্রায় দুই দিবস লাগিবে । আপনি এখানে উপস্থিত না হইলে, আমি স্বয়ংই ইহাকে আপনার নিকট রাখিয়া আসিতাম ।”

তাঁহার পর আমরা রামকুমার বাবুর কথামত গঙ্গাভি-

মুখে বাজা করিলাম । গমন কালীন তাঁহাকে কহিলাম,  
 “মহাশয় ! কুম্মিকার কি প্রকারে আপনার আশ্রয়ে  
 আসিল, জানিতে বড়ই ব্যগ্র হইয়াছি ।” তিনি কহি-  
 লেন,—“ইতিমধ্যে আমি কোন প্রয়োজন বশতঃ দেব-  
 পুর গিয়াছিলাম, তথা হইতে প্রত্যাগমন কালীন একদা  
 রজনীযোগে, জাহ্নবী তীরে দেবপুরের ঘাটে, কুম্মি-  
 কার সহিত আমার সাক্ষাৎ হয় । অনাধিনী, নিঃ-  
 সহায়ী অথচ ভদ্রবংশসম্বৃত্তা বালিকা দেখিয়া, পরি-  
 চয় জিজ্ঞাসা করি । তাহাতে শুনি, যে ইনি মৃত বিশ্বনাথ  
 বন্দ্যোপাধ্যায়ের কন্যা একগণে মাতৃহীনা, নিঃসহায়ী ।  
 শুনিয়া বড়ই দুঃখিত হইলাম, কহিলাম, “মা ! তোমার  
 পিতার অঙ্গে আমি পালিত ; যদি ইচ্ছা কর আমার  
 গৃহে চল, আমার কন্যার ন্যায় থাকিবে । আমার  
 গৃহেও আর কেহ নাই—একমাত্র বিধবা কন্যা আছে ;  
 তোমাকে আমি কন্যানির্কিশেষে পালন করিব—আমার  
 সহিত চল—কোন রূপ আশঙ্কা করিও না । তাহার  
 পর, ইনি আমার প্রস্তাবে স্বীকৃতা হইলে, ইহাকে  
 গৃহে লইয়া আসি । তাহার পর আমার কন্যার  
 প্রমুখাৎ ইহার এখানে আসিবার কারণ অবগত হই-  
 য়াছি । এইরূপ কথা প্রসঙ্গে আমরা জাহ্নবীতীরে

আসিয়া উপনীত হইলাম । কুম্মিকা, রামকুমার বাবুর  
কম্বার নিমিত্ত কাঁদিতে লাগিল । রামকুমার বাবু  
তাঁহাকে কাঁদিতে নিষেধ করিলেন ; কহিলেন, “এ  
সকল বিধাতার ইচ্ছা—বিধাতারই বা দোষ কি ?  
এ সকল আমার পাপের প্রায়শ্চিত্ত—আমার কর্ম  
ফল ।” তাহার পর, তিনি আমাদের অন্য এক-  
খানি নৌকা স্থির করিয়া দিলেন । নৌকায় উঠিবার  
সময়, আমি তাঁহাকে কৃতজ্ঞতার চিহ্ন স্বরূপ এক  
খানি এক শত টাকার নোট দিলাম । তিনি উহা  
গ্রহণ করিলেন না—কহিলেন, “আমার প্রতি দয়া  
প্রকাশ করিবেন না—আমি অতি পাপিষ্ঠ ও নরা-  
ধম, আমার পাপের প্রায়শ্চিত্ত নাই ।” পরে ক্রমে  
ইতস্ততঃ করিয়া কহিলেন, “মহাশয় আমার যে নাম  
শুনিয়াছেন, উহা প্রকৃত নহে—উহা আমার কল্পিত  
নাম মাত্র । এক্ষণে মিথ্যা কহিয়া আর পাপের পোষা  
ভারি করিব না । আমার নাম—হরিহর ঘোষাল ।  
নৌকা ছাড়িয়া দিল । হরিহর আর সেখানে দাঁড়া-  
ইল না ।

আজি কয়েক দিবস হইল দেবপুরের বাগীতে আসি-  
য়াছি । তোমার আসিবার কথা ছিল, আসিলে না

কেন ? এখানকার সংবাদ শুভ । তোমার কুশল সংবাদ  
লিখিয়া সুখী করিবে । ইতি—

তাং ১৫ই অগ্রহায়ণ  
১২৭০ সাল ।

তোমারই স্নেহাকঙ্কী  
বসন্ত কুমার ।

হরকুমার চট্টোপাধ্যায়ের পত্র ।

বসন্ত কুমার !

তোমার পত্র পাইয়া আমার চমক হইল । তোমার  
পত্রের শেষাংশ পাঠে স্মরণ হইল, যে তোমার সহিত  
সাক্ষাৎ করিব অঙ্গীকার করিয়াছিলাম । অঙ্গীকার  
ভঙ্গ জন্য বোধ হয় আমি বিশেষ দুঃখিত না হইয়া  
থাকিব । কিন্তু, তোমার দুর্দিনে তোমার নিকট  
থাকিতে পারিলাম না ইহাই পরিতাপের বিষয় ।  
কয়েক দিবস অতীত হইল, আমি একরূপ সংসার  
চিন্তায় উদাসীন ছিলাম । আমার এই উদাসীন্য কোথা  
হইতে আসিয়াছিল শুন । ইতিপূর্বে তোমাকে যে পত্র  
লিখি, তাহার প্রায় দুই তিন দিবস পরে একদা রজনী-  
যোগে হেম বাবুর বহির্গৃহে বসিয়া আছি । রাত্রি



জ্যোৎস্নাগয়ী । হেম বাবুর বহির্গৃহের কক্ষবাতায়ন  
 মধ্য দিয়া চন্দ্রালোক কক্ষ মধ্যে প্রবেশ করিয়া কক্ষ-  
 সজ্জায় পড়িয়াছে । আমি এক খানি চেয়ারে বসিয়া  
 আছি । আমার সম্মুখে এক' বৃহৎ টেবিল, তত্পরি  
 এক করোটি\* ও চিকিৎসা শাস্ত্র সম্বন্ধীয় কতকগুলি  
 পুস্তক । হেম বাবু একটি ক্ষুদ্র ডাক্তার । রাত্রি অনেক,  
 গ্রাম নিশ্চুতি হইয়াছে, কেবল মাত্র নৈশপতন কম্পিত  
 বৃক্ষ পত্রের বর্ষ বর্ষ শব্দ ও আঁধার বিচারী পেচকের  
 কঠোর কণ্ঠ বাতীত আর কিছুই শ্রুত হইতেছে না ।  
 সম্মুখে বিকট করোটি চন্দ্রালোক বিভাসিত হইয়া  
 বিরাজ করিতেছে । ভয়ানকে মধুর মিলন ! ভয়ানক  
 করোটি, মধুর কোঁয়দী । যখন ভীমকাস্ত, বর্ষনোমুখ,  
 দিগন্তব্যাপী জলদ কোলে মোহিনী বিজলী খেলে, তখন  
 ভয়ানকে মধুর মিলন হইয়া থাকে—নিবিড় জলদ-  
 মালার ভীমকাস্ত শোভা, মোহিনী বিজলীর মধুর  
 বিকাশ । যখন ভীম শ্মশান ক্ষেত্রে, স্বর্গজন্ম কানধিনীচূত  
 বিছাতের ন্যায় দীপ্ত নারী প্রতিমা দাহার্থে বিসর্জিত  
 হয়, তখন ভয়ানকে মধুর মিলন হইয়া থাকে—ভয়ানক  
 শ্মশান, তাহাতে বিছাৎপ্রতিম রমণী দেহের তৎকাল.

\* Skull.

স্বায়ী মধুর স্রবমা । যখন দক্ষালয়ে সতী প্রাণত্যাগে,  
 ত্রিপুরারী দেবাদিদেব মহাদেব ভীষণ সংহার মূর্তি  
 ধারণ করিয়া, বিদ্যুৎপ্রতিম সতীশব্দক্ষে, কক্ষভ্রষ্ট  
 মহাগ্রহের নাগ চরাচর পরিভ্রমণ করিয়াছিলেন, তখন  
 ভয়ানকে মধুরে মিশিয়াছিল!—হরের ব্যোমস্পর্শী  
 কম্পিত অটাসম্বিত কুম্বশ্রেণী বিজড়িত সংহারত্রিশূল-  
 ধারী উদ্বেলিতপ্রলয়পয়োধিক্রুপি ভয়ানক রুদ্ধমূর্তি ;  
 আর অভিমানিনী আকুলায়িত কুম্বলা সতীর অনসী-  
 কুসুমবর্ষাভা, বাসন্তীপবনমাধুরী-বিজড়িত, জ্যোৎস্না-  
 লোকগচিভা, ভীম রুদ্ধশব্দ-শায়িনী দেহলতার মধুর  
 স্রবমা ! যাহা হউক, সেই চন্দ্রালোকমণ্ডিত বিকট কেরা-  
 টীর প্রতি দেখিতে দেখিতে প্রাণ উদাস হইয়া উঠিল ।  
 রজনী গভীরা, শব্দশূন্য, চন্দ্রালোকে শুক্লাধরা ; সম্মুখ  
 এত সাধের মানুষ-প্রতিমার দুখসয় অবশেষ ! আঁধার  
 দেবমন্দির ! দীপ নির্ঝাপিত হইয়াছে ! দেব অন্তঃস্থিত  
 হইয়াছেন—শূন্য আঁধার মন্দির পড়িয়া রহিয়াছে ! এই  
 দেবশূন্য দেবমন্দির প্রতি দেখিতে দেখিতে প্রাণ হ—হ  
 করিয়া উঠিল । কি এক অপূর্ণতাব আসিয়া সংসারের  
 সহিত মনের বে বন্ধন ছিল তাহা বিচ্ছিন্ন করিয়া—মনকে  
 সংসার হইতে পৃথক করিয়া কোথায় লইয়া চলিল ।

সংসার প্রতি চাহিলাম, চন্দ্রালোক প্রতি চাহিলাম—  
মধুর অফুল কোয়ুদী—অসার, ক্ষীণপ্রভ বোধ হইল ;  
চন্দ্রালোকের মাধুর্যা হৃদয় মধ্যে অনুভূত হইল না ।  
নৈশপবনে বৈরাগ্য গীত হইল । তখন সেই বিকট করে  
টীকে মনে মনে জিজ্ঞাসা করিলাম, “হে সুবর্ণ মন্দির !  
তোমার ভিতর যে দেব এত দিন বিরাজ করিয়াছিলেন  
তিনি কোথায় ?” সহসা যেন দিব্যকণ প্রাপ্ত হইলাম—  
শুনিলাম বিকট করেটা কঠোর স্বরে বলিতেছে, “আর  
কোথায় ! যেখানে সকলই গিয়াছে ও যাইবে ।”

আ । সে কোথায় ?

ক । যাহাকে, তোমরা “অনন্ত” বল ।

আ । সে, কি ? সে কোথায় ?

ক । যেখানে, আমি যাইব ।

আমি বলিলাম, “তুমি আবার কোথায় যাইবে ?  
তুমি ত চূর্ণীকৃত হইলে ধূলিগুঁড়া হইবে অর্থাৎ, যে যে  
ভৌতিক পদার্থের সমষ্টিতে তুমি গঠিত সেই সেই  
পদার্থে তোমার মহাবিলয় ঘটবে ।” করেটা কহিল,  
“আমার অভ্যন্তরস্থ মহাজীবও যে যে ভৌতিক পদা-  
র্থের সম্বন্ধে গঠিত সেই সেই পদার্থে বিলীন হইয়াছেন,  
তিনিও মাটিতে মিশাইয়াছেন আমিও মাটিতে মিশাইব ।

তোমার ঐ স্বৰ্ণ মন্দিরাত্যস্তরস্থ মহাজীবও এইরূপ এক দিন নাটিতে মিশাইবেন ।” আমি চমকিত হইলাম ; কহিলাম, “আমাদিগের এই দেহ ত ভৌতিক পদার্থের সম্বায়ে গঠিত ; আত্মাও কি তাহাই ?” কবোটা কহিল, “আত্মা কি তাহা জান ? শরীর যন্ত্রের গতি মাত্র । শরীরস্থ প্রত্যেক পরমাণুই আত্মা—সুতরাং আত্মা ভৌতিক পদার্থের সম্বায়ে ফল । পরমাণুই দেহ, পরমাণুই আত্মা, পরমাণুই ঈশ্বর । অন্য ঈশ্বর, অন্য আত্মা কল্পনাভগতের কথা মাত্র ।” আমি নিস্তব্ধ হইলাম । হৃদয়ের অন্ধতম প্রদেশে যে একটি দীপ জ্বলিতেছিল, যে দীপের সাস্ত্রনারূপ স্বর্ণকিরণ মৃত্যুর অন্ধকারময়ী বিকট ছায়াকেও যেন উজ্জ্বল করিয়া তুলে ; যে দীপ মরণোন্মুখের তমসচ্ছন্ন শূন্যপ্রান্তরসম হৃদয়ে, আশা, ভরসা ও সাস্ত্রনার মোহিনী কিরণ ঢালিয়া, সেই ভীমাকারের উপর কি যেন কি এক অপূৰ্ণ আলোক আনিয়া ফেলে—সেই শূন্য প্রান্তরে কি জানি কি আশার প্রসূন ফুটায়, আজি নিশীথে কবোটাকঠনিঃসৃত মহাবাক্য শুনিয়া সচসা সেই প্রথর দীপালোক মলিন হইয়া গেল । দীপ নির্ঝাণোন্মুখ হইল । পরে সন্দেহজনিত এক খানা কাল মেঘ আসিয়া হৃদয় আঁধার করিয়া তুলিল ।

তখন সেই জ্যোৎস্নাজলধৌতা শকশূন্যা রজনী গভীরা  
 হইলে গৃহে ফিরিলাম ! তাহার পর কয়েক দিবস  
 এই ভাবে কাটিয়া গেল । ইতিমধ্যে এক দিবস হেম  
 বাবুর বাগানে বসিয়া আছি, সন্ধ্যা হইল । সান্ধ্যগগ-  
 নের নীলিমা দেখিলাম । মস্তকোপরি, নীল সাগরে  
 চাঁদ ভাসিল ; জ্যোৎস্না ফুটিল ; সেই জ্যোৎস্না রক্তের  
 শ্যামল পত্ররাজি বিধৌত করিয়া কানন মধ্যে ফুটিল ;  
 কাননভূষণ অমৃত কুসুম জ্যোৎস্নাস্নাত হইয়া নৈশপবনে  
 দুর্লভে লাগিল । আমি উদাস চিত্তে এই সকল দেখিতে  
 লাগিলাম । উর্দ্ধে অনন্ত নীলাকাশ জ্যোৎস্নাজল-  
 ধৌতা ; নিম্নে সমস্ত প্রকৃতি চন্দ্রকরোজ্জ্বল ! ভাবি-  
 লাম, এই যে মধুময় ক্রীড়াশীল জড়জগৎ, ইহা কাহার  
 খেলা ? কত দিন হইতে ইহাবু। এই মধুময় খেলা খেলি-  
 তেছে ? কত দিন সূর্য্য ? কত দিন আঁধারে আলোক  
 ফুটিয়াছে ? কত দিন চাঁদ ? কত দিন জ্যোৎস্না ? কত দিন  
 বায়ু ? কত দিন ফুল ? উর্দ্ধে, অধর পথে এই যে কোটী  
 কোটী পৃথিবী, ইহারাই বা কত দিন ? বিবিধ রত্ন-  
 পূর্ণ অনন্তসৌন্দর্য্যভাণ্ডার এই যে মাটির বিশ্ব, ইহাতে  
 এই যে অনন্ত কোটী জীব, তন্মধ্যে এই যে সুন্দর নরনারী  
 প্রতিমা, ইহারাই বা কত দিন ? কে বলিবে কত দিন !

ভাল, ইহারা কোথা হইতে আসিল ? পরমাণু কোথা হইতে আসিল ? বসন্তকুমার ! এই জগৎশরীরে কি কোন আত্মা নাই ? শরীরস্থ প্রত্যেক পরমাণু ব্যতীত, শরীর যন্ত্রের গতি ব্যতীত, কি আত্মা স্বতন্ত্র নহে ? আত্মা কি ? উহা কি ? তাহা জানি না—বুঝাইতে পারি না । তর্ক সহায়ে আত্মার অস্তিত্ব বুঝাইতে পারি না ; আত্মা কি তর্কে ঈশ্বরঅস্তিত্ব বিলুপ্ত হয় । তর্ক ছাড়িয়া দাও । মাকীর পুতুল ! আমাদিগের জ্ঞান ও বুদ্ধির সীমা আছে ; সেই সীমাবদ্ধ ক্ষুদ্রাদপি ক্ষুদ্র বুদ্ধিতে যাহা অপরিমিত, অনন্ত সূতরাং অজ্ঞেয় তাহা কি প্রকারে বুঝিব ! বুঝিতে না পারিয়া তাহা স্বীকার করিব না এ মত অতি অসার । ভাই হে ! কেরাটী বাক্যে আমার হৃদয় মরুভূমি হইয়াছিল—ঈশ্বরে বিশ্বাস হারাইতে ছিলাম । যে হৃদয়ে ঈশ্বরে অশ্বাস তাহা মরুভূমি নহে ত কি ? দেখ, এই অনন্ত ক্রীড়াশীল, অসংখ্য রত্নরাশিময় সংসার, যে সংসারে অতি ক্ষুদ্রাদপি ক্ষুদ্র কীট পতঙ্গ অনন্ত কোশলের স্থান, অনন্ত জ্ঞানের ভাণ্ডার, যে সংসারে পথিস্থ এক গাছি তৃণ ও ক্ষুদ্র এক নীহার বিন্দুর গুণ, বুদ্ধমণ্ডলী সমস্ত জীবনে বুঝিয়া উঠিতে পারেন না—এই যে বিস্ময়াধার পৃথিবী;—

উদ্বে, এই যে অনন্ত নীলাকাশ—উহাতে আবার এই যে কোটি কোটি পৃথিবী ছুটাছুটি করিতেছে, ইহা কি সকলই কেবল পরমাণুর খেলা? ইহার কি নিয়ন্তা কেহ নাই? সকলই কি কেবল অন্ধ নিয়মের কাজ? অসংখ্যানকত্রখচিত নীলচন্দ্রাতপমণ্ডিত প্রকৃতির এই মহা প্রাঙ্গণে দাঁড়াইয়া কোন মনুষ্যপতঙ্গ সেই সঙ্কময় ঈশ্বরের অস্তিত্বে অবিশ্বাস করিবে? সেই সঙ্কনিয়ন্তা ঈশ্বরে আমার বিশ্বাস দিন দিন বর্দ্ধিত হউক, আমি ধর্ম্য বিনাশক কঠোর করোটি চূর্ণীকৃত করিয়াছি।

তোমারই স্নেহভিখারী

হরকুমার।

পুঃ—

হা কৃষ্ণ! মানুষ কি স্বার্থপর! আমি ত নিজ মনো-  
ছঃখ তোমাকে পঞ্চদশ পৃষ্ঠা লিখিয়া ফেলিলাম।  
তোমাদিগের সহজে একটি কথাও মিথ্যাসা করিলাম  
না। কি করিব তাই, এই পাপ করোটি আমাকে সংসার-  
চিন্তা হইতে সম্পূর্ণ উদাসীন রাখিয়াছিল। বাহা হউক,  
একণে আমি প্রকৃতির এবং মানন্দের সন্মানে তোমাকে

অমুচ্ছা প্রদান করিতেছি যে তুমি তোমার চিরবাহিত  
সরলা বালা কুম্মিকাকে বিবাহ করিতে কোন মতে কাল  
বিলম্ব করিবে না । ইতি—

তাং ২রা পৌষ }  
১২৭০ সাল । } হরকুমার শর্মা ।

### বসন্তকুমার মুখোপাধ্যায়ের পত্র ।

অভিন্নহৃদয় হরকুমার !

প্রায় দুই মাস হইল, আধ্যাত্মিক বাগ্‌বিত্তগুপ্ত  
তোমার এক খানি পত্র পাইয়াছি । তদ্বত্তরে লিখিতেছি  
যে তুমি, করোটা ও পঞ্চভূত ছাড়িয়া শীঘ্রই এ অধী-  
নের আলয়ে দেখা দিবে । আমি ইতিমধ্যে বিবাহ  
করিব সঙ্কল্প করিয়াছি । আগামী ১৯শে ফাল্গুন বিবা-  
হের দিন ধার্য হইয়াছে । তোমাদের ওখান হইতে  
দেবপুরে আসিতে প্রায় তিন দিবস লাগিবে । নাগাৎ  
১২ই ফাল্গুন যেন কোন মতে তোমাদের যুগলরূপ  
দর্শনে বঞ্চিত না হই! আর অধিক কি লিখিব ! হাঁ—



আর এক কথা । গত মাঘ মাসে নীলাঞ্জিকার বিবাহ হইয়া গিয়াছে । নীলাঞ্জিকার স্বামী সুপাত্র, পশ্চিম প্রদেশে কোন হউমে কর্ম্য করেন । তাঁহার নিবাস ভদ্রেশ্বর । বিবাহ কার্য্য সমাধা করিয়াই তিনি পশ্চিম যাত্রা করিয়াছেন । শুনিলাম, দুই চারি মাস পরে তাঁহার বনিতাকে ভদ্রেশ্বরের বাণীতে লইয়া যাইবেন । এক্ষণে, নীলাঞ্জিকা তাঁহার পিতৃগৃহেই অবস্থান করিতেছে । আজি কালি তাঁহার আর পূর্বের ন্যায় ভাব নাই । আমি তাঁহার সম্বন্ধে বিস্তর আশঙ্কা করিয়া ছিলাম । এক্ষণে, নীলাঞ্জিকা পূর্বাশ্রমে বিস্তর প্রফুল্ল, বিস্তর শাস্ত । কুমুমিকা ও নীলাঞ্জিকা সর্বদাই একত্রে থাকে । কুমুম গহনা পরিতে অস্বস্তি করিতে বড় নারাজ ; নীলাঞ্জিকা তাঁহাকে ধরিয়া গহনা পরাইয়া দেয়, চুল বাঁধিয়া দেয়, কখন কখনও তাঁহার ক্ষত্র ললাটে দেশে ছোট রকমের একটি টিপ কাটিয়া দেয়; উভয়ে উদ্যান মধ্যে একত্রে বেড়ায়, একত্রে ফুল তুলে । নীলাঞ্জিকার মালা গাঁথিবার বড় সাধ ; হইল এক ছড়া মালা গাঁথিয়া কুমুমের খোঁপায় পরাইয়া দিল ; কুমুম দুইটা ক্ষুটস্থ গোলাব লইয়া নীলাঞ্জিকার কবরী ভূষিতা করিল । বালাবধিই ইহারা পরস্পরকে ভাল বাসে, তবে

আজি কালি ইহাদের প্রথম স্রোত যেন অধিক বান্ধিত ।  
 কুমুম হরিহর ঘোষালের গৃহ হইতে এখানে আসিয়াই  
 শুনিল যে, নীলাঞ্জিকার বিবাহ । সে জিজ্ঞাসা করিল,  
 “দিদি! ইচ্ছা করিয়া বিবাহ করিতেছ? ইহাতে কি  
 তুমি সুখী হইবে?” এই কথা শুনিয়া নীলাঞ্জিকার  
 চক্ষু জলভারস্বস্তিত হইল, অতি কষ্টে চক্ষুর জল  
 সম্বরণ করিয়া কুমুমকে কহিল, “ভগ্নি! ঠাকুর যুথ  
 মনে করিয়া আমি পূৰ্ব্ব কথা বিস্মৃত হইব।” কুমুম  
 বলিল, “বিস্মৃত হইতে পারিবে? একবার ভাল  
 বাসিলে কি কখন ভুলার যায়?” নীলাঞ্জিকা কহিল,  
 “কুমুম, আমি আমার চিত্ত সংযত করিয়াছি, তুমি  
 আমার অন্য দুঃখিত হইও না।” হরকুমার! এই  
 সকল কথা আমি কুমুমিকার নিকট শুনিয়াছি। নীলা-  
 জ্ঞিকার চিত্তসংযমে প্রয়াস প্রশংসনীয়। নীলা-  
 জ্ঞিকা এক্ষণে আমাকে দেখিলেই অতি কুণ্ঠিতভাবে  
 সরিয়া যায়, যাহাতে সে আমার নয়ন পথে না পড়ে  
 এরূপ যত্নও করিয়া থাকে। সৰ্বদাই দূরে দূরে  
 থাকে। আবার কখন কখন আমার অজান্তসারে সকল  
 নয়নে, দূর হইতে আমার প্রতি চাহিয়া থাকে—আবার  
 আমার দৃষ্টিপথে পড়িলেই তৎক্ষণাৎ সলজ্জ ভাবে সে

স্থান ত্যাগ করিয়া যায় । প্রার্থনা করি, জগদীশ্বর এই  
বালিকারূপে চিত্তসংযমোপযোগী বল প্রদান করুন ।

দেবপুর ।  
তাং ৫ই ফাল্গুন  
১২৭০ সাল । } , তোমারই  
বসন্ত ।

০২০১০

### হরকুমার চট্টোপাধ্যায়ের পত্র

ভাই হে ! নৌকাঘানে জাহ্নবীজলকল্লোল শুনিতে  
শুনিতে গৃহে আসিয়া পৌঁছিয়াছি । বাটী আসিয়া অবধি  
প্রভাহই গৃহিণী প্রমদার মুখে তোমাদের কথা শুনিয়া  
থাকি । প্রমদা তোমার নববিবাহিতা পত্নীর সরল একু-  
তির বড়ই প্রশংসা করে । সর্কাপেক্ষা সে তোমার ভগ্নী  
ভুবনমোহিনীর সৌজন্যে একান্ত মুগ্ধা । আর প্রমদার  
মুখে নীলাঞ্জিকার কথাও শুনিলাম । তুমি লিখিয়া-  
ছিলে, নীলাঞ্জিকা পূর্কাপেক্ষা বিস্তর প্রকুল । উহা  
তোমার ভ্রম । নীলাঞ্জিকা এক্ষণে মেধময় প্রভাতের  
মলিন পদ্ম—ফুটিতে চেষ্টা করিতেছে কিন্তু পারিতেছে  
না—প্রকুল হইতে চেষ্টা করে, কিন্তু পারে না । নীলা-  
ঞ্জিকা কি হাসে না ? হাসে, কিন্তু তাহা বিছাৎপ্রতিম—  
দেখিতে না দেখিতেই অধরপ্রান্তে মিলাইয়া যায় ।

শ্রমদার মুখে শুনিলাম, তোমার বিবাহদিনে অস্তঃ-  
 পূরস্থ নারীমহলে মহা ধুম পড়িয়া গিয়াছে—সকলেই  
 তোমার বিবাহ উপলক্ষে ব্যস্ত—কেহ বিবাহের মাল-  
 লিক কর্ণে ব্যস্ত, কেহ আমোদে ব্যস্ত, কেহ বা অল-  
 ক্তার লইয়াই ব্যস্ত । নীলাঞ্জিকা কি ব্যস্ত ছিল না?  
 নীলাঞ্জিকা আপন হৃদয়সংগ্রাম লইয়া ব্যস্ত ছিল ।  
 তোমার বিবাহদিনে তাহার ক্ষুদ্র হৃদয়খানিও ভিতর  
 যে কি হইতেছিল, তাহা কে বুঝিবে ! সমবেত নারী  
 মণ্ডলী মধ্যে বসিয়া কতবার তাহার স্বহৃৎ চক্ষু দুইটি  
 জলে পুরিয়া গিয়াছে, কত কষ্টে সে তখন সেই চক্ষের  
 জল সম্বরণ করিয়াছে, তাহা কে বুঝিবে ! কাঁদিবার  
 জন্য প্রাণ বাহির হইতেছে অথচ কাঁদিতে পারিতেছ  
 না, ইহা কি সামান্য ক্লেশ ! চিত্তসংঘম কঠোর ব্রত—  
 স্রোতের প্রতিকূলে বাহিতে হইবে । নীলাঞ্জিকা প্রতি-  
 কূলে রাহিতেই চেষ্টা করিতেছে কিন্তু পারিতেছে না ।  
 সে একগুণে চাহিতেছে কি, “বিস্মৃতি” কিন্তু স্মৃতি  
 যে ইচ্ছাধীন নহে । দূরহটক তোমাকে আর এ সকল  
 কথা লিখিয়া উদ্ভিগ্ন করিব না । তোমাদিগের কুশল  
 সংবাদ লিখিয়া সুখী করিবে । আমরা ভাল আছি ।

২রা টৈত্র

১২৭০ সাল ।

}

হরকুমার শর্মা ।

## কুম্বিকার প্রতি নীলাঞ্জিকার পত্র ।

প্রিয় কুম্ব !

প্রায় দুই বৎসর হইল স্বামীগৃহে আসিয়াছি ।  
প্রথম প্রথম তোমার কয়েক খানি পত্র পাইয়াছিলাম ।  
আজি কালি তোমার পত্র পাই না কেন ? বুধবারে  
তোমার একখানি পত্র পাইয়াছি—কিন্তু উহা আজি চয়-  
নাসের পর। তুমি লিখিয়াছ, আমি এখানে আসিয়া  
তোমাদিগকে বিস্মৃত হইয়াছি । এ রহস্য কেন ? ভগ্নি !  
তোমাদিগকে আমি এ জীবনে ভুলিতে পারিব না । এই  
দুই বৎসর কাল তোমাদিগকে দেখি নাই সত্য, কিন্তু  
এই দুই বৎসরের মধ্যে কবে তোমাদের বিষয় না ভাবি-  
য়াছি ? এমতও হইয়াছে যে স্বামীর সহিত কথোপকথন  
কালে তোমাদের কথা মনে হইয়া এতদূর অনামনা  
হইয়াছি যে তাঁহার কথার প্রত্যুত্তর দিতে পারি নাই ;  
ইহার নিমিত্ত কতবার তাঁহার নিকট তিরস্কৃতও হই-  
য়াছি । ভদ্রেখরে আসিয়া প্রথম বৎসর একরূপ কাটিয়া-  
ছিল । গৃহধর্মে মন বসিতেছিল—অনেকটা ভাল  
ছিলাম । আজি কালি যে আমার কি হইয়াছে বলিতে  
পারি না । কিছুতেই মন নাই, কিছুই ভাল লাগে না—

কেবল দেবপুরের গৃহ মনে পড়ে ও তাহারই সঙ্গে সঙ্গে  
কতকথা মনে পড়ে। তোমাদিগকে দেখিবার জন্য প্রাণ  
ব্যাকুল হইয়া উঠে। আর যে তোমাদিগের সহিত  
সাক্ষাৎ হইবে এমনত ভরসা করি না। পিতা যদি গৃহে  
থাকিতেন তাহা হইলেও বা এক সময় দেবপুর যাইবার  
আশা থাকিত। তিনিও কাশীবাসী। বহুদিবস হইল  
তাঁহারও কোন সংবাদ পাই নাই।

যাহা হউক তোমার প্রিয় স্বামীকে ও ঠাকুরঝিকে  
আমার প্রণাম জানাইও। আর যদি জিজ্ঞাসা করেন  
ত বলিও—নীলাজিকা ভাল আছে। আমার মাধার  
দিব্য এ লিপি তোমার স্বামীকে দেখাইও না। আর  
এক কথা—তোমার সেই চন্দ্রমল্লিকার গাছগুলি কেমন  
আছে? আমি যে মাধবীলতাটা তোমাদের উদ্যানে স্বহস্তে  
পুঁতিয়া আসিয়াছিলাম সেটুকু বড় হইয়াছে? তাহাতে  
ফুল ফুটিতেছে কি না, লিখিবে। আমাদের এখানেও  
অনেকগুলি ফুলের গাছ আছে, কিন্তু ইহাদের প্রতি আমার  
মায়া নাই—কেন, বলিতে পারি না। আজি এই পর্য্যন্ত,  
তোমার পত্র আসিলে আর আর কথা লিখিব।

৮ই বৈশাখ  
১২৭৩ সাল।  
ভদ্রেস্বর।

তোমারই—  
সেই  
নীলাজিকা।

নীলাঞ্জিকার প্রতি কুম্ভিকার পত্র ।

দিদি !

তোমার পত্র পাইয়াছি । তুমি বাহা নিবেধ করিয়াছিলে তাহাই কইয়াছে । তিনি তোমার পত্র দেখিয়াছেন । কালি বৈকালে শয়নকক্ষ বসিয়া তোমার পত্র পড়িতেছি, স্বামী আসিলেন । আমার কেমন কইল পত্রখানি লুকাইতে পারিলাম না । স্বামী আজি কালি তোমার সংবাদ জানিবার জন্য বড় ব্যস্ত । তিনি তোমার পত্র দেখিয়া আগ্রহসহকারে পড়িতে লাগিলেন । আমি দেখিলাম পড়িতে পড়িতে তাঁহার চক্ষু জলে পুরিয়া গেল । দিদি ! তুমি মনে করিও না যে আমার স্বামী তোমাকে বিস্মৃত কইয়াছেন ; তোমার প্রতি তাঁহার স্নেহ পূর্বেও যেরূপ ছিল, আজিও সেইরূপ ।

তোমার মনের অন্থখ গুনিয়া বড়ই কষ্ট কইল । তুমি লিখিয়াছ, তুমি আমার জন্য সর্বদা ভাবিয়া থাক ; আমি কি তোমার জন্য ভাবি না ? তুমি লিখিয়াছ যে আর আমাদের সহিত তোমার সাক্ষাৎ

হইবে না। সত্যি কি আর তোমাকে দেখিতে পাইব না? ভাল, বালিকাবয়স এত শীঘ্র ফুরায় কেন? আমার ইচ্ছা আবার বালিকাবয়স ফিরিয়া আসে—আবার তোমাতে আমাতে সেইরূপ হাল্কা মনে একত্রে বেড়াই! আমার বোধ হয় যতই আমরা দিগের বয়স বাড়িতে থাকে ততই যেন আমরা দিগের মন কি জানি কেমন একরূপ ভারি হইয়া উঠে; লোকে এত ভারি মন লইয়া কি করিয়া থাকে! সে যাহা হউক তুমি আমার সেই চন্দ্রমল্লিকাগাছ-গুলির কথা জিজ্ঞাসা করিয়াছ; সেগুলি বেশ বড় বড় হইয়াছে; তাহাতে অনেক ফুল ফুটিতেছে। তোমার মাধবীলতাটী অনেক দিন হইল শুকাইয়া গিয়াছে। আমি অনেক যত্ন করিয়াছিলাম। বাঁচিল না। আর কি লিখিব! আমার প্রিয়স্বামীর ও ঠাকুরঝির আশীর্বাদ জানিবে। ইতি—

তাং ১২ই বৈশাখ  
১২৭৩সাল।

কুম্মিকা।





বসন্তকুমারের প্রতি নীলাঞ্জিকার পত্র ।

বসন্তকুমার !

আমি পাপিষ্ঠা—পাপিষ্ঠা না হইলে আজ তোমাকে এই পত্র লিখিতে বাসিলাম কেন ? পাপিষ্ঠা না হইলে আজিও তোমাকে ভুলিতে পারিলাম না কেন ? চিত্ত সংযত করিতে যত্ন করি নাই এমত নহে, তথাপি আমার চিত্ত বশীভূত হইল না কেন ? তুমি আমাকে ভালবাস না জানিয়াও তোমাকে ভুলিতে পারি না কেন ? তুমি মনে করিও না যে আমার চিত্ত দমনে ইচ্ছা ছিল না—চিত্ত দমনে ইচ্ছা না থাকিলে বিবাহ করিব কেন ? যে দিন জানিতে পারিয়াছিলাম আমার জন্য তোমার হৃদয়ে এতটুকুও স্থান নাই, সেই দিনই বিষ খাইয়া মরিতাম ; কিন্তু তখন মনে করিলাম, যদি বিধাতার এইরূপই ইচ্ছা তবে বিষ খাইয়া মরি কেন—আমি চিত্ত সংযত করিব । কিন্তু এখন ভাবি, তখন বিষ খাই নাই কেন ! যিনি আমাকে ভাল বাসেন—যাঁহাকে ভালবাসা আমার ধর্ম্ম তাঁহাকে ভাল বাসিতে পারিলাম না—স্বামীচরণে মন রাখিতে পারিলাম না, কেন ?

নন্দনকানন থাকিতে পদ্ম পৃথিবীর পক্ষে ফুটে কেন ?  
 ললাটলিখন ! পূর্বে চিন্তদমনে ইচ্ছা ছিল এখন  
 আর সে ইচ্ছাও নাই । পূর্বে তোমাকে ভুলিতে চেষ্টা  
 করিতাম, এক্ষণে ইচ্ছা করিয়া তোমার চিন্তা করি । এ  
 জগতে তোমার চিন্তা ভিন্ন আমার আর কিছুই নাই—  
 অন্য কোন আশা নাই—অন্য কোন আকাঙ্ক্ষাও নাই ।  
 সকল আশা সকল আকাঙ্ক্ষা এ জন্মের মধ্যে ফুরাই-  
 যাচ্ছে । বসন্তকুমার ! আজি কয়েকমাস হইতে আমি  
 উন্মাদগ্রস্তা হইয়াছি । আমার এই পীড়া স্থায়ী নহে—  
 কখন আসে, কখন যায় । আজি প্রায় দুই মাস হইল  
 স্বামী পাশ্চিম—কর্ম্মস্থলে গিয়াছেন । আমার চিকিৎসা-  
 সার জন্য চিকিৎসক নিযুক্ত করিয়া দিয়াছেন । চিকিৎসা  
 হইতেছে কিন্তু পীড়ার কিছুমাত্র উপশম হয় নাই,  
 বরং বৃদ্ধি হইয়াছে । যখন রোগাক্রান্তা হই তখন  
 কেমন থাকি জানি না ; আর যখন ভাল থাকি, তখনই  
 কি ভাল থাকি ?—প্রাণের ভিতর ধু, ধু করে ; সহসা  
 কে যেন আসিয়া নিশ্বাসের পথ রুদ্ধ করিয়া দাঁড়ায়—  
 একটা নিশ্বাস একবার, দুইবার, তিনবারে টানিতে হয় ।  
 গৃহে মন ভিঠে না—গৃহ যেন শ্মশান বলিয়া বোধ  
 হয় । আমার প্রাণ যে কেমন করে তাহা কেবল আমিই

জানি। নির্দয়! কোন পাপে আমি এই নরকানল দিবা-  
 নিশি বুকে করিয়া বহন করিতেছি? কোন পাপে  
 আমার অন্তর বাহির শূন্য হইয়া গিয়াছে? ভাল  
 বাসিয়া? ভালবাসা কি পাপ? প্রণয় কি দোষাবহ?  
 আমার এই প্রণয় কি দোষাবহ? বসন্তকুমার!  
 আমার প্রণয় দোষাবহই হউক আর যাচাই চউক—  
 আমি পাপিষ্ঠাই হই আর যাচাই হই, তুমি ইহা  
 নিশ্চিত জানিও যে এই পাপিষ্ঠা অপেক্ষা এ পৃথিবীতে  
 তোমাকে আর কেহই অধিক ভাল বাসিবে না। আমার  
 ইহ জন্মের সকল আশা, সকল আকাঙ্ক্ষা ফুরাইয়াছে।  
 কেবল এক আকাঙ্ক্ষা আজও আছে—মরিবার সময়  
 তোমার মুখ দেখিয়া মরিব। কিন্তু তাহারই বা সম্ভাবনা  
 কোথায়? বুঝি জগদীশ্বর আমার অদৃষ্টে সে সুখও  
 লিখেন নাই! ঈশ্বর তোমাকে সুখী করুন! আমার  
 দিন ফুরাইয়া আসিয়াছে—আমি আর অধিক দিন  
 বাঁচিব না।

১৭ই ফাল্গুন  
 ১২৭৩ সাল।

মন্দতাগিনী  
 নীলাঞ্জিকা।

নীলাঞ্জিকার প্রতি বসন্তকুমারের পত্র ।

নীলাঞ্জিকা ! তোমায় শীড়ার কথা শুনিয়া অত্যন্ত  
 দুঃখিত হইলাম । বিধাতার নিকট প্রার্থনা করি যেন  
 তুমি শীঘ্রই আরোগ্য লাভ কর ! আমি তোমার কোন  
 কথারই প্রত্যুত্তর লিখিতে পারিলাম না । তোমার পত্রে  
 আমি অত্যন্ত কাতর হইয়াছি । সংসারের মনঃপীড়াই  
 বুঝি ঈশ্বরের ইচ্ছা ! যাহা হউক তুমি মনে করিও না  
 যে তোমার প্রতি আমার স্নেহ নাই—তোমার প্রতি  
 আমার স্নেহ বরাবর ছিল, আজিও আছে, চিরকাল  
 থাকিবেও । তবে এইমাত্র জানিও যে স্নেহ এক, ভাল-  
 বাসী আর ।

২০শে ফাল্গুন  
 ১২৭৩সাল ।

}

বসন্তকুমার ।

---

হরকুমারের প্রতি বসন্তকুমারের পত্র ।

হরকুমার !

চারি মাস পূর্বে নীলাঞ্জিকার এক খানি পত্র  
পাইয়াছিলাম । তাহার প্রত্যুত্তরে বাহা লিখি তাহাও  
তোমাকে জানাইয়াছি । এই কয়েক মাসের মধ্যে তাহার  
আর কোন সংবাদ পাই নাই । আমিও তাহাকে আর  
কোন পত্র লিখিতে সাহস করি নাই । আজি সপ্তাহ কাল  
হইল এক দিন রাত্রিশেষে চিন্তাপীড়িত হৃদয়ে জাহ্নবী-  
তীরে বেড়াইতেছিলাম । চন্দ্রমা অস্তমিত হইয়াছে ।  
এখনও রাত্রি রহিয়াছে । প্রারট্‌কাল । মেঘ আসিয়া  
সমস্ত আকাশ ঢাকিয়াছে । ঠেঁকে ঘনাকার ; ভাগীরথী-  
তীরে সেই অন্ধকার ঘন আরও ঘনীভূত হইয়াছে ।  
বিশালভাগীরথী হৃদয় সেই অন্ধকারে বিস্তৃত হইয়া রহি-  
য়াছে । ভাগীরথীতীরে যে স্থানে আমি বেড়াইতে-  
ছিলাম তাহার অদূরে এক অতি বিস্তৃত শ্মশানভূমি ।  
সেই শ্মশান ভূমিতে তখন কাহার শবদাহ হইতেছিল ।  
তাহার চিত্তপ্রজ্বলিত আলোকে অস্পষ্টদৃষ্ট শ্মশান-  
ভূমি অধিকতর ভীষণ দেখাইতেছিল । প্রকৃতি নীরব—

৮৪ . বসন্তকুমারের পত্র ।

বায়ু পর্য্যাস্ত বহিতেছে না, কেবলমাত্র শ্মশানভূমিহ  
শবভুক্ত পশুগণের কর্কশ কণ্ঠের ক্বচিৎধ্বনি ও বিপুল-  
সলিলা ভাগীরথীর কল কল রব । সহসা সেই নীরব,  
অন্ধকারময় ভাগীরথীতীরে মধুর রমণীকণ্ঠে কে গাইয়া  
উঠিল ;—

“পহিল বয়স মোর না পুরল সাধে ।

পরিহরি গেলা পিয়া কোন অপরাধে ॥”

যে গাহিতেছিল, সে এই পর্য্যাস্ত গাহিয়াই থামিল ।  
তাহার স্বর অতি কোমল ও মর্মভেদী । কে গাহিতেছে  
দেখিবার জন্য সেই অন্ধকারময়ী নদীতীরে ইতস্ততঃ  
অন্বেষণ করিলাম । কাহাকেও দেখিতে পাইলাম না ।  
ক্রমপরে শ্মশানমধ্য হইতে আবার সেই কোমল মর্ম-  
ভেদীস্বরে গীত হইল ;—

“স্বথের লাগিয়া এ ঘর বাঁধিনু

. আঙুনে পুড়িয়া গেল—”

এবার স্বর শুনিয়া আমি চমকিত হইলাম । দ্রুতপদে  
শ্মশান মধ্যে প্রবেশ করিলাম । সেই বিস্তৃত শ্মশান-  
ভূমি মধ্যে যে শব্দাহ হইতেছিল তাহার চিত্তপ্রজ্বলিত  
আলোকে, শ্মশানপ্রান্তে, অম্পষ্টে এক স্ত্রীমূর্তি লক্ষিত

হইল । তাহার নিকটে যাইয়া যাহা দেখিলাম তাহাতে  
 স্তম্ভিত হইলাম—বাক্যক্ষুর্তি হইল না । দেখিলাম সেই  
 স্ত্রীমূর্তি—নীলাঞ্জিকা ! তাহাকে দেখিয়া আমার হৃদয়  
 বায়ুবিভাড়িত মেঘখণ্ডের ন্যায় ছিন্ন ভিন্ন হইয়া গেল ।  
 তাহার সে রূপ নাই—পূর্বের প্রফুল্লকমলতুলা অনিন্দা-  
 মোহিনী রূপরাশি বিকৃত হইয়াছে । তাহার সুদীর্ঘানবিড়-  
 কৃষ্ণকেশদার্ম এক্ষণে আলুলায়িত, কৃষ্ণ ও জটায়ুক্ত ।  
 তাহার বসন ইগরিক ও অম্পায়ত । আমি নীলাঞ্জিকার  
 সম্মুখীন হইলে সে বিস্ফারিতলোচনে আমার প্রতি চাহিয়া  
 রহিল—তাহার দৃষ্টি অর্থশূন্য । নির্ঝাণোগ্রুথ চিত্তার  
 ক্ষীণালোকে তাহাকে দেখিয়া শ্মশানবিহারিণী তৈরবী  
 বলিয়া বোধ হইল । আমি সজ্জমূঞ্জের ন্যায় তাহার  
 মুখপ্রতি চাহিয়া রহিলাম ; নীলাঞ্জিকা যুহু যুহু গাহিতে  
 লাগিল ;—

সুনীল মেঘের কোলে কই সে আমার চাঁদের হাসি  
 সূচ্যাম শ্যামের বামে কই সে আমার রাই রূপনী !

তাহার পর সে যুহু অথচ অম্পটম্বরে কি বলিতে  
 লাগিল । আমি কহিলাম, “নীলাঞ্জিকা ! কি বলিতেছ—  
 আমাকে কি চিনিতে পারিতেছ না ?” নীলাঞ্জিকা কিছুই

বলিল না । পরে সহসা উচ্চহাস্য করিয়া উঠিল । আমি দেখিলাম এক্ষণে ইহাকে কোন কথা জিজ্ঞাসা করা রূথা । ভাবিতে লাগিলাম, কি উপায়ে ইহাকে গৃহে লইয়া যাই ! নীলাঞ্জিকা আবার য়ুহু য়ুহু গাহিতে লাগিল ;—

গলে দোলে বনমালা

কাণে দোলে ছুল,

যমুনা পুলিনে সই

মজিল ছুকুল ।

এই সময় সেই তমসাবৃত শ্মশানভূমে যে শবদাহ হইতেছিল তাহার চিতা নিবিল । অন্ধকার শ্মশানভূমি আরও অন্ধকার হইল । নীলাঞ্জিকা নির্ঝাপিত চিতার প্রতি নির্দেশ করিয়া কহিল “দেখ—দেখ—সব পুড়ে গেল—মানুষ পুড়ে গেল—দেখবে এস—দেখবে এস”—ইহা বলিয়া যে স্থানে শবদাহ হইতেছিল সেই দিকে দৌড়াইল । তখন রাত্রি রহিয়াছে । বিশ্বমণ্ডল অন্ধকারে “পূর্ণ । আকাশে ঘোরতর মেঘাডম্বর;—মেঘ ডাকিল, বায়ু গর্জিল তৎসহ শ্মশানভূমিস্থ শবভুক পশুগণের বিকট কণ্ঠ মিশিল । আমি স্বপ্নবিমূঢ়ের ন্যায়—মন্ত্র-মুগ্ধের ন্যায় নীলাঞ্জিকার পশ্চাৎ পশ্চাৎ দৌড়াইলাম ।



কিন্তু আর তাহাকে দেখিতে পাইলাম না। বড় ব্যস্তিতে  
বিশ্ব ভোলপাড় করিতে লাগিল।



তাহার পর কয়েক দিবস ক্রমাগতই নীলাঞ্জলিকার  
অন্বেষণ করিলাম। কোথায়ও তাহার সন্ধান মিলিল  
না। চত্রেখরে তাহার অনেক খোঁজ করিয়াছিলাম, কিন্তু  
সেই শুল্কানকিছারিণী উম্মাদিনীর আর কোন সন্ধানই  
মিলিল না। ইতি—

তাং ৭ই শ্রাবণ }  
১২৭৪ সাল। }  
দেবপুর। }

বসন্ত ।



সমাপ্ত ।

